

EX BIBLIOTHECA H.W.OCHS,  
AB OCHSENSTEIN.

Nicolaï. Sc. Vi.



Contenta.

1. Spruch & Jung Verdicten von dem  
Wiederrichtent. 1596

1) Ich: vaa. 47.

2) Matth: va. 33.

3) 1. Thesf. av. 13. ff.

2. Lasu. quodru & d. rino. Luc. xv  
1556

3. Brieg. Büchlin. 1556

4. Snyfostomi Büchlin 1559

5. Dir Dreyß, Dir Trägen Dreyß 1572

6. Melantson Manual. 1554

7. Eiusd. ad locum Celoff. aa. ps. 6. 157

Videte ne quis vos decipiat &

x 6 von glauban, MS

+ 8 Ave maria, MS



*[Faint, illegible handwritten text on aged paper]*





# Ein hüpfch

schön Büchlin des heili

gen Joannis Chrysostomi / Bis  
schoffs zu Cōstantinopel / vor eilff  
hundert Jaren geprediget / vber  
das Apophthegma vnd kurzen  
Spruch / ES VVIRT NIE  
MAT GESCHEDIGT DANN

VON IM SELBS. Verneü  
lich außgangen vñ  
verteütscht.

Durch M. Matthiam Erbium,  
Predicant zu Kychenwyr.

Biß gedultig alle zeyt  
In der wält vnd creützes streyt  
So wirst du dir kein schaden thon  
Aber durch Gottes krafft beston.

Getruckt zu Mülhusen im  
oberen Elsaf durch Pe-  
ter Schmid.



# Züden getrenkten † trageren.

Wer da leydet gern vnrecht  
Vnd wirt darzü auch verschmecht  
Vons Herren Christi wegen  
Der hat den rechten seggen  
Mit gedult er vberwindt  
Den Teüfel vnd alle synd.



Der Wolgeborenen vnd  
tugentreychen Frauen / Anna  
Alexandria / Geborne Gräfin zu  
Fürstenberg / vnd witwe zu Ka-  
polstein / zc. der Christenli-  
chen Frauen / zc.

**G**nad / frid / vñ trost von Gott dem  
Vatter durch Jesum Christum /  
Amen. zc. Wolgeborene / Christens-  
liche / Gnädige frau / die weyl von anfang  
vnd vorigen zeyten / vnd noch bey vns auff  
den heuttigen tag / die wütende / arge / vñ  
boßhafftige wält / wider die Gottsälige /  
auff heiliger geschribten vnd langest Bes-  
warte leer / tobet vnd vn Sinnig ist. Welchs  
wir dann nit allein sehen inn den kindern  
des vnglaubens / sonder auch bey denen  
so Gottsälig wöllen seyn / vñ aber gleych-  
ner vnd eigennützig sind. So ist dise leer  
des heiligen Chrysostomi (on zweyfel) ein  
fruchtbar leer denenn so vmb Christi Bes-  
känntnuß willen / nichts wöllen leyden / vñ  
so inen etwas von wegen der Gottsälige-  
keit vnd bekänntnuß Christi willen / züges-  
fügt / so schreyen sy sich geschediget / an leyb /  
eer / vnd güte / vnd so sy die hand an den  
pflug gelegt / sehen sy wider hinder sich / vñ Luc. 9.  
fallen zu rugk.



Solchs flagen vñ abfal ist gewesen vor  
eilffhundert jar (zū der zeyt des heiligen  
Chrysofostomi) eben wie yetzund / dann die  
gleychñner so vmb der warheit etwas ley-  
den / die flagen wie sy geschediget vnd ver-  
derbt werden. Senen vnd dergleychen zū  
begegnē / hat der heilig Chrysofostomus vor  
zeyten Bischoff zū Constantinopel / dise pre-  
dig gethon vnd beschriben / die ich auß dē  
latin **L. G.** verteütscht / nicht von wort zū  
wort / das doch alle mal vnuerständig wes-  
re / sonder Paraphrasticos / vnd nach völli-  
gem teütschen. Dann bey der meinung  
Chrysofostomi bin ich bliben.

Diß Büchlin aber zū loben / ist nit vō ho-  
hen nöten / dann das werck seinen meister  
selbs lobt. Doch sag ich für mein vrtail / dz  
Chrysofostomus (wil doch niemand sein mei-  
nüg verachtē) in erklärung dises spruchs /  
**Es wirt niemand geschedigt dan**  
von jm selbs / ein rechter Christenlicher  
Philosophus ist / bewärt solchs mit gschrif-  
ten vnd exemplen auß der heiligen Bibel  
welche vbertrifft alle weyßheit vnd philos-  
ophy der Heiden / die wol auch vil vnbil-  
lichs erlitten mit gedult / aber nit vmb der  
er Gottes vnd Christi willen.

Als der hochuerständig vnd gedultig So-  
crates / der wol willig das gifft (vnschul-  
dig) jm von den Athenern eyngeschenckt /  
trancke /



trancke/ oder wie auch Anaxagoras vonn  
den Athenern giffit willig trancke / allein  
darumb daß er gesagt hatte/ die Son wer  
ein feüriger stein. Es ist auch der todt des  
Philosophi Senece willig gewesen / der  
im alle aderen im wasserbad liesse schlahē/  
vnd als sich d tod verlengeret/ hat er giffit  
gehöuschen/ damit er sturbe. Aber solliche  
töd alle vmb verjehung vnd bekantnuß  
Gottes vnd Christi willen nit beschehen:  
darumb wir das vrtail inn Gottes gwalt  
stellen. Es sind Aristoteles vñ Plato samt  
anderen/ in hoher erfahrung natürlicher din  
gen/ vnd politischen zuchten vnd guten sit  
ten/ von Gott hochgeleert gewesen/ welis  
cher fleyß vnd arbeit gar nit zü verachten/  
haben aber die philosophhey/ die der heilig  
Chrysostomus auß heiligen Biblischen ge  
schrifften züsamen tragē/ nie erlangt. Dan  
wiewol sy züchtig vnd gedultig/ haben sy  
doch zum merer teil ein Stoische meinung  
rumbegirige/ vñ wältliche gedult gehabt.  
Aber Christus leert vil ein andere gedult/  
die nit wältliche eer/ lob vñnd rüm süchet/  
sonder ein solche/ die der wältlichen dingē  
sich entschlahē/ vnd sich im creütz vnd ande  
ren anfechtungen/ mit rechter gedult Gott  
willig ergebe/ vñnd alle trübsal diser wält  
mit standhaftigem gemüt möge tragen/  
die vns Christus (aller außervölten vora



bild vnd exempel) auß himlischer philosophy gelect hat/als er sagt/ Sälig sind jr wenn euch die menschen schmähen vñ verfolgen/vnd redend allerley args wid euch so sy daran liegen/vmb meines nammens willen/haben fröud vñ frolocken/es wirt euch im himel wol vergolten werden. Also  
Matth. 5. sagt auch Christus/ Wil mir yemäds nach folgen/der verlaugne sich selbst/vnd neme sein creütz auff sich/vnd volg mir nach. Es sind diser spruch vil mer durch dē münd Christi vns vorgepredigt/die nichts ands anzeigen vnd leeren dann gedult in armüt vnd creütz/vnd verfolgung/verachtung/vnd verlierung leybs vnd läbens. Aber solches solle beschehen (solle es anders Gott ein wolgefellig opffer seyn) vmb der Her Gottes vñ Christi willen. Also haben auch  
Act. 5. die Apostel Christi/wie Lucas sagt/ Die Apostel giengē frölich von des raths angesicht/ daß sy würdig gewesen waren/vmb Christi nammen willen schmach zu leyden. Vnd an einem anderen ort/ Durch vil trübsal muß man eynghehn in das reych der himmel. Also sagt auch der heilig Paulus/  
1. Corint. 4. Wir werden getrengt/ aber wir werden darumb nit angsthaft. Wir leyden arbeit/aber wir verzagen nit/wir leyden verfolgung/aber wir werden nicht verlassen/wir werden vndergetruckt/aber wir kommen



men nit vmb. Diser sprüch sind vnzelichen vil in heiliger geschrifften/darinnen Gottes kinder sollen täglich studieren / darmit der alt stoltz Adam lerne der wält absterben/ vnnnd sich dem creütz vnderwürfflich mache/ sich selbs nicht liebe/ willig seye in Gottes zucht/vnd das mit hoher gedult/ durch beystand Gottes vnnnd anrüffung Christi. Vñ so ein gläubiger in diser hohen schul/Christlich gstudiert/fürfart/ so wirt im kein Creatur mögen schaden zufügen/ wie dan der heilig Chrystomus in disem Büchlin philosophiert.

Solchs hab ich E. G. wollen zuschicken auß Christenlichem eyfer/als einer solchen Christin/die bissher nit wenig anstoß gehabt/von allerley widersächeren/vnd aber alle zeyt vn beweglichen auff dē felsen Christo bestanden. Der wölle E. G. also in beharrlicher vñ waarer gedult/beständigem glauben/vnnnd immerwerender hoffnung bis an das end sälliglich erhalten/ vñ das greulich brumlen vnd hellisch lönwengeschrey der tyrannen/ so die begründte warheit verfolgen/abwenden/ vnnnd inen das waar liecht der wält Jesum Christum den sun des läbendigen Gottes/gebe zu erkennen/Amen.



Der Barmhertzig Gott bewar Eurer  
Gnad mit seinem heiligen schirm. Keys  
chenwyr auff den 14. tag Maiens / im tau  
send / fünffhundert vnd neun vn̄n fünffzig  
sten Jar.

L. G.

allzeyt gehors  
samer

Matthias Erb.

Das creütz Christi ist fürwar  
Ein exempel offenbar  
Allen den so willig sind  
Vnd bgern werden Gottes kind.

Joannis



# Joannis Chrysostrami

auflegung über den Spruch / Es  
wird niemand verletzt dann von  
im selber. 2c.



**C**h weiß vast wol  
daß den vnuerstän-  
digen / vnd bey de-  
nenn so zeytlichen  
wollust nachtrach-  
ten / oder so irdisch  
gsinnet / vnd iren Begirden vñ an-  
fechtungen ergebē sind / vñ nichts  
auff geistliche weyß vrtailen / diser  
vnser spruch den wir handlen wöl-  
len / vnd also lautet / Es wird nie-  
mand geschediget dan von im sel-  
ber / als etwas selzās / vnd etwas  
neüw erachtet / vnd werden vnser  
villeycht daran spotten / daß wir  
gerad im anfang dises Spruchs  
vnd predig ein vngschickten titel /  
welcher der warheit (wie sy meis-  
nen / vngemäß / fürtragen. Wir  
wollen aber derwegē nit abstehn /

a v



sonder dahin all vnser vermögen  
(mit Gottes hilff) richten/dz wir  
auff das best Beweysen vnd Bewä-  
rē/welchs wir in disem spruch ver-  
heissen haben. Doch Bittē wir euch  
daß jr anfangs gedultig vnd still  
wöllen seyn / ob jr schon vermein-  
ten/vnser red laute nit wol/vnnd  
wöllē vns nit gleych anfangs ver-  
wirren vnd widersprechen/sonder  
erwartē/Biß wir vnser predig auß-  
geführt haben. So hoff ich gewiß-  
lich / daß jr mit vns werden dran  
seyn/vndeuch selbs vnrecht gebē/  
vnd widerrüffende / verzeyhung  
Begerenn:vsach / jr haben disem  
spruch Bissher nit recht verstandē.  
Jr werden vns auch darūm dan-  
cken wie ein siech dem Arzet dan-  
cket/der jm geholffen hat.

Derhalben nit not/ die falsche  
meinung deren du lang gewonet  
hast/mir fürzehaltē/ aber Bis ein  
kleins weylin still/Biß wir vnser di-  
sputaz außfüren/ so wirst du ein  
recht



recht vrtail in diser fach sprechen.  
Dan wir wollen die verwirte mei-  
nung deiner vernufft / durch das  
so wir bewären werden / ableinen  
vnd dich in einen rechten verstand  
füren. Es lassen die wältlichen  
Richter zu in gemeinen geschaff-  
ten / ob sy schon ein wolberedtenit  
vnd schwergigen fürsprechen hö-  
ren / daß sich das gegenteil verant-  
worte / vnd hörends mit gedult.  
Es lassen sich auch die Richter nit  
dahin bewegen / daß sy gleych (ob  
schon die fach gar gerecht were)  
das vrtail sprechen / sonder sy ver-  
hören auch das gegenteil / welches  
dann billich ist an allen Rechten /  
daß das gegenteil auch solle verhö-  
ret werden / vnd darnach sol man  
das recht vnd billich ist / erkennen  
vnd sprechen.

Dieweyl wir dann auch mitvir  
serem handel ebenn wie ein kläger  
sind / vnd müssen die alte langwis-  
rige meinung / derē yederman ges



wonet/ableinē/da man also sagt:  
Alle ding sind in der wält gschānt  
vnd verwüster/vnd bey den mens  
schen gehe es nirgēd recht zū/dan  
wir sehē/sagen etliche/wievil täg  
lich geschediget vnd plaget werde  
wider alles Billich. Die starcken vñ  
gwaltigen vndertrucken die nider  
trächtigen vñ schwachen. Die  
reychen stossen die armen in sack/  
wie man spricht. Vñd als wenig  
man die tropffen wassers im meer  
zelennt mag/also sind auch vnzal  
barlich die so geplaget vñ vnrecht  
leyden/also daß weder gebott/oz  
der sayungen/noch Oberkeit/oz  
der grösserer gewalt solchen scha  
den mag weeren/wie mans dann  
täglich sieht im gegenteil/wie die  
bösen sich meren vnd zunehmen/  
also daß die getrengtē solche vnbil  
lichheit beweinen/vñd darüber  
achzen. Die Richter vnd Oberkei  
ten/die darumß verordnet seind/  
daß sy solliches solten Besseren/die  
rich



richten vil malen noch vil schwär-  
rer vnnnd schädlicher vngewitter  
an.

Es hat auch solcher schad souil  
zügenomen / daß vil vnſäliger vn-  
toechter menschen dahin geraten  
sind / daß sy Gottes fürsichtigkeit  
voraus so sy sähē / daß die so from̄  
vnd fridsam läben / hin vnd wider  
an den gerichtten vñher gezogen  
werden / darzū gefangen / Beküm-  
mert vnd getödt werden / Vnd a-  
ber sehen im gegēteil / wie die mit  
willigen vnd schölnen / vnd solche  
leüt die kein güet gemüt haben / in  
reychthum̄ zünemmen / in gwalt  
vnd eeren aufgehen / ab denen ye-  
derman erschrickt. Item daß der /  
so die frommen eerenleut mit vn-  
aufhörlichem creutz beleidiget / vñ  
ja auch (das ich die warheit sage)  
mit füßen tretten / vil vnd bestän-  
digs glück haben. Soliche schalck-  
heit aber / vnbillichheit vnnnd vn-  
gleychheit beschicht nicht allein in



stetren / sonder inn allen landen /  
auch nit allein auff dem land / son-  
der auch auff dem meer / &c.

Dieweyl dan solche opinion vñ  
meinung auß einem alten mißuer-  
stand entstandē / so ist's notwēdig  
d̄z wir dise vnserē predig darwider  
stellen. Vñ werden aber gnüg zū  
schaffen habē / bis wir die veralte-  
te vñ falsche meinung stürzen vñ  
ableinen. Vnd wiewol (als ich o-  
ben gesagt) dise vnserē predig dur-  
cket vil menschen neuw vñ seltsam  
seyn / so wil ich doch denen zūsagē /  
so dise mein predig vñnd disputaz  
werden fleysig hören vñ aufmer-  
cken / befinden werdē warhafftig  
vnd inen nutzlich seyn / vñnd das  
wil ich beweysen vñnd darthun.  
Derwegen lasse sich niemand be-  
kümern / so er disen spruch hört /  
**NIEMAND MAG GESCHE-  
DIGET VVERDEN DANN  
VON IM SELBER. &c.**

Auff das aber solches offenbas  
rer



rer vñ verständigiger sey / so ist not-  
wendig zu wissen was verlegen o-  
der schädigen sey / oder worinnen  
vñd womit man verletzt werde /  
welches dann heiter wirdt / so wir  
erlernen erstlichen / was des mens-  
schen tugend sey / oder worinnen sy  
stehe. So dann wirdt warhafftig  
erlernet / wie / vñ woher der mensch  
Beschädiget werde / vñd doch kei-  
nen schaden empfacht. Damit es  
aber klärer sey / so wöllend wir es  
mit exemplen anzeigen. Namli-  
chen also: Inn allen dingen findet  
man ein abnehmen vñd schaden  
z. c. Der rost schädiget das eysen /  
Die schaben schädigen das wullin-  
tuch. Ein wolff schädiget ein herd-  
schaff / der weyn wirdt zu essich /  
Die süffigkeit des honigs zerstört  
die bitterkeit / die röte vñd miltau  
schädiget das korn / der hagel schä-  
diget die reben / die höuwschrecken  
schädigen vñd erzen ab allerley kreü-  
ter vñd gwächs / also thünd auch



Die Käfer vñ räupen / Die alle ding  
zernagen / vñ damit ich die red Bez  
fürge / so sicht man an allem vych  
vnd menschen allerley Franckhei  
ten / die sy schädigen / vñ jre gesund  
heit verderben. Also hat ein yedes  
ding sein zerstörung / mit welcher  
das wesen vnd gesundheit zerstö  
ret wirt.

Sürter wöllenn wir auch ersü  
chen womit die tugenden mensch  
lichs gemüt geschädigt vnd ver  
derbt werden / daruon etliche sel  
zame meinung haben / derwegen  
wir auch die falsche meinung müs  
sen ableinen / vnd die warheit of  
fenbarlich Beweysen vnd waar  
machen / daß vns fürwar niemād  
mag schädigen / dann eben wir  
selbs. Aber vil vermeinen / die ar  
müt / Item schmach vnd schand  
schädige vns. Etlich vermeinen  
Der tod thue vns schaden / Beweinē  
auch solche ding tägliche / als stün  
de aller menschen jamer vñ ellend  
inns



inn disen widerwertigen dingen/  
vnd vermeinen daß die so in solchē  
jamer vnnnd ellend stecken/die solle  
man wol Beklagen / Ja sagen sy/  
was hat doch diser ellends erlittē.  
Item alle mal sagē sy also / O wee  
disem ist sein güt genommen wor-  
den. Item sy sagen von den Kran-  
ckē / Ach diser ligt tödtlich krank/  
vnd haben im die Arzet das leben  
abgesagt. Es sind auch vil welche  
die gefangnen beweinen / oder die  
so von irem vatterland sind ver-  
jagt worden in das ellend. Etlich  
Klagen die so frey gewesen / vnnnd  
werden eigen leüt. Etlich beweine  
die / welchen jr güt von den feindē  
Beraubt wirt / vnd sy in gefangen-  
schafft kommen. Es sind vil die  
da beweinen die schiffbrüchigen /  
oder die so durch feür oder durch  
fallen vmbkommen.

Über soliche klagt man / heulet  
vnnnd beweinet jr ellend . Aber es  
sind iren gar wenig / die da klagen

b



vber das läben der Gottlosen / vñ  
das ist noch vil böser / daß solliche  
leüt von yederman gelobt / vñ für  
from̄ geacht werden / welchs alles  
bösen ein vrsach ist. Wolan wir  
wollen Beweysen (so jr anders still  
wollen seyn / wie ich euch oben ge-  
bätten) vñ anzeigen daß deren  
dingen keins / wie dan̄ yezund erz-  
zelle sind / mögen einem fürsichti-  
gen vñ Gottsäligen mann scha-  
den thun / oder sein gemüt schedi-  
gen. Wolan sag an / was schaden  
hat der in seinem gemüt empfan-  
gen / dem sein güit genommen ist /  
oder der geschmächt ist wordenn /  
oder der von dieben vñ mördern  
etwas erlitten hat. So es euch nū  
güt dunckt / so wollen wir erstlich  
dARTHIN / was da seyē die tugendē  
des gemüts / vñ damit es aber de-  
ster heiterer werde / so wollen wir  
auß leyblichen dingen / exemplen  
vñ gleychnussen solchs dARTHIN.  
Vñ zum Beyspil wollen wir sē  
herr



hen/welchs da seyen die Krafft vñ  
tugēd an einem rossz. Lieber ach-  
tet man ein rossz darumb güt / so  
es einen silberin zaum hat / oder  
mit einem hüpschen tapet / vñ seys  
denen strichen dareyn zogen / ge-  
zieret / vnd hat ein satteldecke mit  
Berlin gesticket / vnd daß die menē  
vnd halßhaar mit seydingen schnü-  
ren geprißen ist: Freylich nein / son-  
der die stercke vñnd dapfferkeit eis-  
nes rossz / merckt man an dem / so  
es schnälles lauffs ist / starcke füß  
hat / vnd sicher gehet / von wolge-  
setzer vñ starcker Brust / also auch  
besicht man es in anderen dingen  
als ob es geschickt sey vber feld zu  
reisen / oder gebreuchlichē im Krie-  
ge / vñnd den feynd dapfferlichen  
anfallt / vnd den so darauff sitz /  
möge schnälliglich auß gefärlich-  
heit erretten. Derwegen ist die  
stercke vnd die tugend eines rossz  
vil mer in dem / so wir yezund erz-  
zellt haben / dann in dem darvon.



oben gesagt. Also sagen wir auch von anderen thieren / welcher sterke vnd nutzbarkeit wirt erlernet auß dem / so es mag grosse Burde tragen / vnd schwäre wägen ziehen. Darum̄ so einer wil ein thier bewären / so lügt er nit was zierd man darauff gelegt hat / sonder er besichts / ob es von glidmaß / vō füßen vnd hüff starck seye.

Also auch so einer wil ein weyn garten beschawen / lügt er nicht auf die breiten rebbletter / od auß gespreiten gerten / sonder ob er voller trauben stande. Also thut mā auch mit den oliuen vnd anderen böumen. Derwegen müssen wir auch also thun mit den menschen / vnd vnder schidlich erfahren / welches rechte tugend der menschen seyē / welche / so sy geschediget werden / so ist dann der ganz mensch auch geschediget.

Nun möchtest du aber fragen /  
Lieber sag an welliches sind doch  
des



Des menschen tugenden? So sag  
ich dir / Es ist nit reychthum das  
mit mā die armūt nit dörffe fürch  
ten. Es ist auch nitte gesundtheit /  
durch welliche wir der Franckheit  
frey sind. Es ist auch nit der güt  
lünd oder hohe achtung / mit wel  
chem wir der menschen nachreden  
ledig sind. Es ist auch nit das ge  
mein zeytlich läben / mit welchem  
wir vermeinē den tod nit zu fürch  
ten. Es ist nicht die frächheit / mit  
wellicher wir der leybeigenschafft  
gelediget werden.

So sagst du / Lieber welches ist  
die tugend des gmüts? So hör zu  
d; ist die tugend des gmüts. Erst  
lichen recht von Gott halten vnd  
glauben / zum andern / fromtlich  
vnd redlich mit allen menschen  
handlen. Dise ding aber alle (von  
welichen wir oben gesagt haben)  
die mögen dem menschen (ob ers  
chon nitte gern thut) genommen  
werden / so er aber die tugend des



gemüts hat / die kan in niemand  
weder entweeren oder nemmen /  
ja auch der Teüfel nicht / aber der  
mensch der solche tugēd hat / mag  
sy wol selbs durch farlässigkeit ver  
lieren. Soliche ding vnd ordnung  
hat der teufel wol gewüßt / als er  
den heiligen Job angriffen hatt /  
vnd alles sein güte verwüßt vnd  
verderbt / welches er aber nit dar  
um gethon / daß er Job in armüt  
Brecht / sonder darumb daß er in  
möcht bewegenn zur Gottslestes  
rung / so Job vmb das verlorene  
güte hette getrauret. Also hat der  
Teufel auch den ganzen leyb des  
heiligen Jobs gepeyniget / nit dar  
umb daß er ihn schwach machte /  
welches in doch nit schädlich war  
sonder vil mer darumb / ob er den  
Job (durch schmerzen vnd peyn)  
sein dapfferkeit möcht matt ma  
chen / vñ beraubt in der tugenden  
seines gemüts / Derwegen der Sa  
tan ihn mit vil ellend geschlagen /  
vnd



vnd seinen leyß mit schwären pla-  
gen (welche etwan ein Hencker ei-  
nem nit zūfügte) hart gepeyni-  
get. Kein Hencker möchte einem  
die seytē also zerreyssen mit einē  
hagken vñ kreüwel / als die würm  
den heiligen Job zernaget haben.  
Welliches alles darumb von dem  
teüfel beschehen / damit er möchte  
Job bewegē wider Gott zū redē.  
Darzū haben auch bescholten dē  
Job seine freünd / die in solten Bil-  
lichen getröst haben / vñ haben  
in aber bitterlichen außgerichtet /  
vnd zū im gesagt / Ja wol du bist  
noch nit gnüg gestraafft vmb dei-  
ner sünd willen / zc. Mit sollichen  
vnd dergleychen Worten haben sy  
den heiligen Job geschmächt.

Aber der güte Job / der seiner  
statt beraubt / vñ seines hauß ent-  
setzt / auch von allen seinenn ge-  
freündtē verlassen / der selbig hat  
für sein Behausung ein misthauf-  
fen / für sein Betthlin den hartenn



Boden/ vnnnd für sein Kleidung ein  
Eaat winckel/ vnnnd wirt aber vn-  
der disen dingen allen nit verletzt/  
sonder vil klärer vnnnd herrlicher/  
vnnnd als der teüfel in aller seiner  
güter vnd haab hat Beraubt/hat  
er im aller erst grosse reychthumß  
der tugendē mit der gedult zu we-  
gen bracht. Dann che Job so vil  
erlitten hat / vnd inn den kampff  
kōmen / hat er freylich Gott dem  
Herren wol vertrauwet / aber nit  
so steyff als do sein creüg hat täg-  
lichs zügenōmen. Dieweyl dann  
Job hat müssen souil von dem teü-  
fel erleyden / vnd ist aber im glau-  
ben stercker worden / vnd der Teü-  
fel (der alle menschē vbertrifft in  
Boßheit vnd grausamkeit) hat in  
an den tugenden seinesgmüts nit  
mögen schädigen. Wer wolt dann  
Billichen mögen sagen / der oder je-  
ner hat mich geschädigt / oder der  
hat mich verderbt oder an meinē  
sachen gehinderet :

So



So dann der Teüfel (der aller  
Bosheit voll ist) alle seine Krefft/  
waaffen vnd pfeyl an dem hauß  
des fromen Jobs gebraucht hat/  
darzu auch an seinem leyß/ vnd  
aber nit mögen schädigen an sei-  
nen tugenden / sonder hat in vil  
mer rümreych vnd eerlich gemach-  
et. Wer wolte dann einen ande-  
ren Beschelten / der im etwas zufü-  
get leyblichen / so er an den tugend-  
de seines gmüts nit sich selbs sche-  
diget?

So haltest du mir aber entgegen/  
vnd sagst / Lieber ist nit Adā Gen. 3.  
geschediget / Betrogen / vnd auß  
dem paradys verstoßen worden?  
Antwort / Der Teüfel hat in nit  
geschediget / sonder sein selbs vn-  
standhafftigkeit / vn faulkeit / vn  
farlässigkeit / vnd das er nit dapf-  
fer gewesen ist / Gottes gebott zu  
halten. Diweyl dann der Teüfel  
so vilerley an heiligen Job versü-  
chet / vnd in mit allerley waaffen



vnd Betrug angerennet hat / vnd  
doch nicht vberwunden oder ver-  
leget / Wie wolte er dann Adam  
(an dem er sein Kunst auch versü-  
chet) vermöcht zu betriegenn/  
wenn sich Adam nicht durch sein  
selbs farlässigkeit willig verder-  
bet hette? So sagst du widerumb:  
Wie haltet aber es sich mit dem/  
der mit lügen verschwezt / wirdt  
verjagt / vnd alle seine haab ver-  
leürt / ist ein sollicher nicht gesche-  
diget / so ihm all sein vätterlich  
erb genommen / vnd er mit ar-  
müt gepeyniget wirdt? Nein /  
gar nicht / sonder so er wachet  
vnd beständige gedult hat / vnd  
sorg tregt / wirdt er ein gewin ha-  
ben.

Sag an was hat die armüt die  
Apostel Christi geschediget? Ha-  
ben sy nicht hunger vnd durst/  
vnd blöße erlitten / vnd sind a-  
ber derwegen desto fürtreffeni-  
cher vnd grösser gehalten worden  
vnd



vnd haben dardurch ein vest ver-  
trauwen zu Gott gehabt: Was  
wöllenn wir aber von dem Laza- Luc. 16.  
ro sagen: Dat ihn nit sein Kranck-  
heit / eissen vnd armüt / zu der sä-  
ligkeit gefürt: vnnnd die peyn dis-  
ser wält die ewig kron zubereitet:  
Was sollen wir sagenn vom Jos-  
seph: der doch daheimen vn vnder  
den frömbden ist geschmächte wor-  
den / daß er auch vnbillichenn des  
Lehrbruchs gezigenn ward / hatt Gen. 39.  
darzu müssen dienenn / vnnnd von  
seinem vatterland vnd geschläch-  
te verstoffenn seyn: Derwegenn er  
Billichenn bey yederman sol hoch  
gehalten werdenn / dieweyl ihn  
Gott hoch gehalten hat. Was sol  
ich aber sagen von mancherley el-  
lend / armüt vnnnd schand / auch  
wie mit dienstbarkeit die heili-  
gen männer Gottes sind beschwä-  
ret worden: Was hat der bitter  
vnd saur tod (der nit eins schlech-  
ten todschlag / sond eines Brüders



Gene. 4. todschlag war) den heiligen Abel  
geschediget: Dieweyl man von di  
sem Abel in aller wält (als von ei  
nem frommen mann) singet vnd  
Matth. 23. sager.

¶ Nun wirst du wol mögen ver  
stehn / daß wir vnseren fürgenom  
nen spruch gnügsam erkläret ha  
benn / dann wir haben das so wir  
verheissen haben / geleistet. Nam  
lichenn daß niemand geschediget  
werde dann von jm selber / ja dar  
zu auch haben wir bewärt / dz die  
heiligen Gottes grossen nutz em  
pfahen / so sy geschediget werden.  
¶ Nun haltestu mir wider für / vnd  
sagst / Wie geht es dann zu / so nie  
mands schediget / oder geschedigt  
wirdt / daß man souil peyn vnd  
straaffen darauff gesetzt hat / wo  
rumb tröuwet man mit dem hel  
lischen feür: Ich Bitt aber / daß du  
derwegen mein predig wöllest nit  
gleich verkeren vnd verachten.  
Wir haben nicht gesagt / daß nie  
mand



mād schedige/sonder daß niemād  
von einem anderenn geschädiget  
werde/aber von im selber. So sa-  
gest du dann wider/Wie geht das  
zu/so etlich schedigen/vñ sol doch  
niemand gschediget werden/dan  
von im selber? Es haben den heili Gene.37.  
gen Joseph seine Brüder geschedi-  
get / vnd vnbillichs wider in für-  
genommen. Joseph aber ist nit ge-  
schediget worden. Also Cain hat  
vnbillichs mit seinem Brüder Abel  
fürgenommen / vnd seinem läben  
nachgestellt/aber Abel ist nitt ge-  
schädiget/hat auch nichts vnrech-  
tes gethon. Derwegen so fallt die  
straaff vnd peyn auff die so scha-  
den thün. Aber die gedult vnd tu-  
gend deren so willig vnrecht ley-  
den/nimpt nit hin das laster denē  
so mit Gottlosem fürsag irē näch-  
sten vnbillichs thün. Vnd wiewol  
die heiligen / so vnbillichs leyden/  
mit irer gedult vil herrlicher wer-  
den/so werden doch dise/so schadē



zūfügen ihrer Bosheit vñnd mit  
willens nicht erlediget / Vñd wie  
die tugend vñnd gedult / die ge-  
schedigten erhöcht inn eeren / also  
auch die Bosheit deren so schaden  
thün / bringe sy in verdammniß /  
Darumb dan Gott der recht Rich-  
ter / denen so manlichen gestritten  
vñd vberwunden haben / dz ewig  
reych eyngibt: aber denē so in irer  
Bosheit beharē / gehört das ewig  
hellisch feür zū. Darum so mā dir  
schaden thüt / vñd dir deine güter  
genomēn werdē / so sag mit Job /  
Ich bin nackend vñnd mitter leyß  
ausgangen / nackend gehe ich wi-  
der hin. Vñ sag mit dem Apostel /  
Wir habend nichts inn die wält  
bracht / auch so mögen wir nichts  
daraus bringen. So du hörest das  
dich yemands bey den menschen  
verflucht / verlündet / vñd schmä-  
het / so gedenc vñ fassz zū hertzen  
die wort des Herren / da er sagt /  
Wee euch so euch alle mensche wol  
reden.

Job 1.

1. Timot. 6.

Luc. 6.



reden. Vñ an einem anderen ort / Matth. 5.  
Fröuwend euch vnd frolocken / so  
sy euwren namen schmähen / als  
etwas böß vñ des menschen suns  
willen. Bist du vom vatterland /  
vnd hauß vnd hof verjagt / so ge-  
denck daß wir kein bleybliche statt Hebr. 13.  
haben / sonder wir müssen ein zü-  
künfftige suchen. Wie kanstu dein  
vatterland verloren haben / so du  
doch auff dem gangen erdbodenn  
ein frömbd ling bist. Bist du aber  
inn schwärer krankheit / so tröst  
dich mit dē wort des Apostels / da 2. Corint. 4.  
er sagt / Ob schō vnser eüsserlicher  
mensch zerstört wirt / so wirt doch  
der inwendig von tag zü tag er-  
neuweret. Bist du gefangen in ei-  
nem thurn / vnd wartest des greü-  
lichen tods / so stelle dir vor augen  
Joannem den Töuffer / der imm Matth. 14.  
Fercker ist enthauptet / Vnd das  
haupt des Propheten ist ein belo-  
nung worden einer vnkeüschē tän-  
zerin. Darüß so mā dir vnbilichs



zufügt/ so sihe nit auff das vnbil-  
lich das dir gschicht/sonder geden-  
cke an die herrlichkeit die vns dar-  
gegen vergolten wirt/ so wirst du  
vor sünden erhalten/vnnd fromb  
seyn/vnd der glaub vnd dapffer-  
keit wirt dich nimmer verlassen/  
dieweyl kein schad an den gütern  
kein schmachred vn̄ schand/kein  
ellend vnd krankheit oder schmer-  
zen/ja auch nicht der tod (den vil  
für ein schwär ding achten) die  
menschen schediget/sonder ist für  
derlich zum ewigen läben/macht  
vns ganz herrlichen. Womit wilt  
du dann bewären/ daß die ding  
schaden thüyen mit welchen doch  
niemandes geschediget wirt:

Ich wil aber auch vnderstehn/  
noch etwas vngewons weyter zu  
schreyben/vnd sag also/daß die al-  
lein werden geschediget/die ande-  
ren schaden zufügen/vnd d̄ schad  
nit deren ist so geschediget werde/  
sonder derē so schaden thün. Dan̄  
zeig



zeig an / welcher ist verflüchter vn  
der den zweyen Brüderem / Abel o  
der Cain: Ists nit Cain: Dan ye Gen. 4.  
das Abel ist zu todt geschlagenn /  
wirt inn aller wält für fromkeit /  
vnd aber des Cains todschlag zur  
schand geprediget. Was ist auch  
ye ellenders erhört dann die thaat  
Herodiadis / deren man dz haupt Matth. 14.  
Joanis auff einem teller hat müs  
sen bringen / damit jr haupt in dz  
ewig hellisch fheür ist geworffenn  
worden. Es ist auch niemand Bos  
hafftiger dann der Teüfel / der a  
ber durch sein Bosheit den heilige Job 2.  
Job vil herrlich gemacht hat. Vn  
ye herrlicher Job wordenn ist / ye  
mer der Teüfel ist gepeyniget wor  
den.

Auf disen exemplen sichstu das  
wir vil mer anzeigen haben / dann  
wir verheissen haben / dann es ist  
bewisen / das niemand von denen  
Beschediget werde / die einem vn  
billichs zufügen / sonder dz sich die



selbs schädigen / die anderen vnbil  
lichs zufügen / so doch weder reich  
thūß / noch freiheit / noch schwach  
heit / oder etwas anders dergley  
chen / dauon wir oben gesagt / sey  
en nit die eigentliche güter des mē  
schen / sonder allein die tugenden  
des gemüts. Darūß so vns etwas  
in eüsserlichen gütern zufällt / mit  
der selbigen verlierung vnd nach  
teil / so wirt der mensch nit geschē  
diget / dann die rechten güter die  
stehn in den tugenden des gmüts.  
So sagstu abermals / so sich aber  
einer gebraucht der rechten Chri  
stenlichen philosophey in den tugē  
deß gmüts / wirt er den nit ver  
legt? Nein freylich. So aber ye  
mand geschädiget wirt / so wirdt  
er von keinem anderen dann von  
im selber geschädiget. So sagst  
du abermal / Wie wirt doch einer  
von im selbs geschädiget? So mer  
cke also / Wenn yemands vonn ei  
nem anderen geschlagen wirt / o  
der



il  
h  
h  
7  
7  
ē  
n  
s  
it  
o  
e  
s.  
r  
i  
ē  
r  
e  
t  
n  
t  
r  
r  
i  
o  
r

der seiner güter Beraubt / od auff  
ein andere weyß von yemand ge-  
peyniget wurde / vnd er aber leste-  
ret Gott / vñ treybe gottlose wort  
der selbig dan der ist seer geschädi-  
diget / nit von einem anderen / son-  
der von jm selbst / das ist durch sein  
vngedult.

Lieber sich was doch Job (wie Job 1.  
oben erzelle) nit von einem men-  
schen / sonder vom Teüfel (der mit  
grausamkeit vñ Bosheit alle wält  
vbertrifft) gelitten hat. So dann  
der grausam vñ blutdurstig  
Teüfel mit so vil anfechtungen /  
Betrug vñ schmerzen den heilic-  
gen Job hat nit mögē dahin trit-  
ten / daß er mit seinen lefftigen sün-  
diget wid Gott / vñ er noch nichts  
vom Gesatz Gottes (das hernach  
allererst Mose gebē ward) hat ge-  
wüßt / auch hat er nit erlangt die  
erlösung vñ auferstendnuß  
Christi (dem zeyt nach) Wie vil  
mer du / d diser dingen yezund be-





richt wirst im glauben (so du Got  
tes gnad anruffest) alles vberwin  
2. Corint. 11. den: Sihe an den einigen Paulū/  
was er (Dz doch) vnzalbarlich ist)  
hat erlitten / als inn gefängtnuß /  
in Banden / geißlen / vnd anderen  
schmerzlichen peynen. Die Juden  
haben in versteiniget / vnd mit rü  
ten geschlagē. Er ist vber die mau  
ren abgelassen worden. Er ist vn  
der den mördern gewesen. Er dul  
det seine feynd / vn̄ falsche Brüder.  
Inwendig hatt er forcht außwen  
dig streich. Er duldet auch den hū  
ger / die blöße / die schmach vnd  
nachstellung / trübsal / vnd wilde  
thier. Vnd wer wils doch alles er  
zelen: Er ist täglichs gestorben /  
vnd in aller widerwertigkeit hat  
er niemand geleseret / oder ein vn  
wirß wort geredt / sonder er frolo  
cket / vnd spricht mit fröuden: Ich  
Col. 1. fröuw mich in der trübsal. Vnd  
2. Corin. 12. an einem anderen ort: Wir rümen  
vns in der trübsal. Diweyl dann  
difer



diser heilig Paulus souil erlitten/  
vnd sich doch erfreuwt/vnnd sich  
der trübsal gerümet / was gnad  
werdē die erlangen/die vñ schlech  
ter schmach / oder streich / oder  
trübsal willē/die doch ringer sind  
dann des heiligen Pauli/Gott dē  
Herren lesteren vnnd schmāhen.  
So sagst du abermals: Ey es hat  
mit mir ein andere meinung/ so  
ich geschediget wird/dan mit dem  
heiligen Paulo/vrsach/wenn ich  
den nit so mich schediget/wurd vñ  
bel schelten vnd außgehn/so kame  
ich vñß alles mein güt / vnd kōn  
te auch niemād etwas güts thūn.  
Das ist warlichen ein böser auß  
zug. Nū hör aber mein antwort/  
Dieweyl dann die werck der Barm  
herzigkeit dir so hoch angelegent  
sind/vnd begerst anderen güts ze  
thūn/vñ almūsen zegeben / so loß  
was ich dir sag/Die armūt hinde  
ret den Barmherzigen menschen  
nit an dē almūsen. Wolan es seye



3. Reg. 17.  
Luc. 4.

Matth. 10.

Du seyest arm / doch wirst du finde  
zwey hellerlin zegebenn / die Gott  
wirt vil höher achten / dann die  
grossen zins vnd gefell der rey-  
chen / vnd gibt dir Gott (on zwey-  
fel) auch ein hendlin vollen mels /  
wie d witwe zu Sarepta / dz gnüg  
wirt seyn den Heliam zu speysen /  
vñ so du solches nit hast / so wirstu  
on zweyfel so vil haben daß du ein  
Becher mit kaltē wasser magst ge-  
ben / der als hoch geacht wirt / als  
so du grosse reychthum außtei-  
lest: vsach / Gott sicht nicht auff  
groß gelt / sonder auff ein barm-  
herzig vnd mitleydigs hertz vnd  
gmüt.

Da lerne nun daß du kein schaz-  
den empfangenn hast / so du dein  
güt verloren hast / vnd arm bist /  
sonder vil nutz vnd gewün ober-  
kompst du. Dann du erlangest /  
durch den gedultigen glaubenn /  
die Kronenn der vnsterblichheit /  
Das andere mit vil almißen wöl-  
len



len verdienen / Das magst du mit  
zweyen hellerlin / oder mit einem  
Becher kaltes wassers (den du auß  
herzlichem vertrauwen vnd glau  
benn auff Gottes gnad inn Jesu  
Christo mitteilst) erlangen. Sol  
liche ding sind nun genügsam of  
fenbar denenn so sich der warheit  
Befleyssen / vnd an irem heil nicht  
seümig sind.

Den wollüstler aber / vnd de  
nen so mit bösen Begirden gefan  
gen / vnd all jr läben inn wollust  
verzeeren / die achten dise reden  
für einen vnnützen tandt / dieweil  
sy vil lieber finsternuß / vnd lufft /  
für die warheit haben. Darumb  
inen die zeytlichen vnd geistlichen  
güter verschwinden / wie d schatt  
vnd lufft.

Derwegenn wollen wir herfür  
bringenn / daß sy sehen die heimli  
che vrsachen diser dingenn / vnd  
die bildtнуß darmit sy betrogen  
werden / ableinen / vnd dargegen



Das inwendig angesicht diser vn-  
sauberen vnd vnreinen hüren/die  
sy lieben/offenbar machen.

Dises zeytlich läben aber heiß  
ich ein hüren/welliches läben inn  
fröuden/inn vberflüssiger reych-  
thumb/in zergenglichem gwalt  
vñ wollust verzeert wirt. Ich nen-  
ne auch dise wält nit ein schlächte  
hüren/sonder ein schandtliche vñ  
stinctende hürē/die da hat ein vn-  
geschaffen vñ hässlich angesicht/  
vñ ja sy sicht grausamlich/erschro-  
ckenlich/vñ ist gar vngestalt/das  
die/so sich irer grausamen gestalt  
vnd Betrug anmassen/Billichē nit  
sol verzigen werden. Vnnd wie-  
wol aber jr angesicht so grausam/  
greülich vnd grim ist/doch findet  
man solche leüt/die von diser hürē  
werdenn leychtlichen gefangenn.  
Vnd ob sy schon mercken das bey  
diser hüren alle ding in gefärlich-  
heit/vnnd nichts dann tödtlicher  
schad/auch nichts dann böse gsell-  
schafft



schafft ist / vñnd ist auch voller  
schmaach vñd schand / neyd vñnd  
hassz / nachstellen / schelten / vñnd  
shedlicher sorgenn / voller forcht  
vñd zitteren / vñd daß sy mit tau-  
senderley böser gsellshaften (wie  
ein hauffen schlangen vmbgeben  
ist) vñnd daß man nichts daruon  
bringet / dann eben schaden vñ ver-  
derbnuß / sampt ewiger verdamm-  
nuß / doch sind irē vil / die diser hü-  
ren Begezen / vñd Bülen vmb sy / ist  
inen auch anmütig. Es sind auch  
etlich so grosse narren / daß sy sich  
von diser huren nicht abwenden /  
wiewol sy offentliche exempel sä-  
hen / deren so täglichs verderben.  
Solche aber acht ich nicht besser /  
dann die Kinder die mit kugelin  
schnellen / oder den topff werffen /  
oder die kugel durch den ring trey-  
ben / vñ den kindischen spilen gar  
fleyssig obligenn / also daß sy nie-  
mand daruon mag abwenden / so  
sy doch die kindschüch vor lägest



solten außgezogē habē / sind auch  
vnderwisen / daß soliches Buppen-  
werck den erwachsenen kein nutz  
bringt / auch kein gut werck dar-  
aus entspringt / dieweyl solche spil  
gehörend für die Kinder. Was wöl-  
lend solliche gesellen für ein ent-  
schuldigung haben / welche yetzūd  
erwachsen zu vollkōninem alter /  
vnd aber mit kindischem alter  
vmbgehn.

¶ Nun fragst du aber weyters /  
Warumb stellt man dann nach  
reychthumb? (darvon wir yetzūd  
wollen handeln.) ¶ Nun so ich frag  
so wirstu freylich also sagen / Dar-  
umb sucht man reychthumb / daß  
man mög der gsundtheit pflegen  
vnd vnserem läben fürsorg thun /  
damit wir vnser eer / dz vatterlād  
vnseren gefreündten vñ yedermā  
mögen behilfflich seyn. Vñ solcher  
meinung ist man an allen orten /  
vnd wirt bis in himel erhebt. Ich  
weiß auch daß dise meinung alle  
wält



wält anzündet / vnd sind derē we-  
nig / die da löschē / sonder vil mer  
die sy anblaasen vnd fürderē.  
Derenn meinung sind die / so der  
reychthum̄ ergeben sind / vnd  
darmit gefangen / vnd sunderli-  
chen die so von reychthum̄ nichts  
solten wüssen. Dann ye man sieht  
daß yederman / er seye mann oder  
weyß / knecht oder freyer / reych o-  
der arm / nach aller vermüglichkeit  
nach reychthum̄ stellet / vnd zu dē  
feür der reychthum̄ / allerley ma-  
terien vnd schwäre läst zu tragen  
mit grosser arbeit. Die läst aber  
neñe ich nit holz oder höuw / dan  
die flammen der reychthum̄ ver-  
brennt solches nit / sonder die vn-  
gerechten vnd vnbillichen burden  
der seelen vnd des leybs / die durch  
böse begirden verbrennt vnd auf-  
gehalten wirdt. Das sichst du an  
den reychen / welliche / wiewol ein  
yeder sonderlich die ganze erden  
besesse / yedoch so wirdt nichts



Besten weniger ein yeder in den Begir-  
den der reychthumß Brünnen.  
Die armen aber / so sy soliches den  
reychen wöllen nachthün / so wer-  
den sy darob toll vnnnd vn Sinnig /  
vnd Bekrencken sich auf mancher-  
ley weyß. Die liebeder reychthumß  
treymbt vnnnd vexiert yederman so  
hefftig / daß man nit achtet weder  
freündtschafft / oder nachbaur-  
schafft / weder weyß noch Kind: die  
reychthumß wirt höher geachtet  
dann dises alles / vnd die Begirden  
des geytz stoßt soliches vmb / vnnnd  
machts zü nichten / vnd Besigt der  
menschen hertzen nit anders / dan  
wie ein wild thier / vnd ein grausa-  
me herrscherin / die iren Begert als  
le ding vnderwürfflich zemachen.  
Sy wütet wie ein vn Sinniger mēsch  
sy zürnet wie ein grausamer wü-  
terich / sy ist vn Sinnig / wie ein vn-  
uerschämte hür / sy erbarmet sich  
vber niemāds / sy ist vnverschämt  
vnnnd row / erschrockenlich / grau-  
sam /



sam/vnbarhertzig/Gottlos vn  
grim/vnnd wiewol die schandli-  
chen Begirden der reychthumb vil  
greülicher wütend/dan die Wölff  
Beren vnd Löwen/yedoch dur-  
ckend sy den menschen ein süß/lieb-  
lich ding seyn/Vnd ja wol süß/es  
dunckt die mensche süßer seyn dan  
honig vnd honigwaben. Vn wie-  
wol sy denen/so iren anhangend/  
mit dem schwerdt nachstellt / vnd  
alles vnglück zürüßtet/vnd in tau-  
senderley gfärlicheit brigt/nichts  
dester weniger so Begert man ire/  
stellt iren nach/vnd sücht sy. Es  
sind auch deren vil / die sich fröus-  
wē/ ob sy schon durch vilerley töd  
nur zum anfang der reychthumb  
möchten kommen. Der geytz ist so  
licher leüt höchste fröud / darinen  
sy sich welgē wie ein sauw im kat/  
vnnd wie ein käfer in rosszdeck.  
Solche leüt aber die sich dem geyt  
ergeben haben/sind vil schandli-  
cher vnd unreiner dann dise thier.



Vñ das aber noch vil verderbter  
daß sy sich täglich in disem kaat be-  
suden/ vnd wollust darinnen ha-  
ben/ vnd das nit von natur / son-  
der auß bösem müewillen. Vnd  
wie möchten wir solche Franckheit  
heilē / dieweyl sy das gmüt besitzet/  
vnd sy vns nit wölten ein wenig  
zuhören / vnd losen auf das so wir  
inen sagen wöllen?

Die vnuernünfftigen vñ stum-  
menden thier / von dē wir gesagt /  
die des kaats gewonet / kan man  
nit bald entwennen / dieweil sy kein  
vernunft haben. Nun aber re-  
den wir zu den menschen / die von  
Gott vernunft vnd verstand em-  
pfangen haben / daß sy solches hö-  
ren / darmit sy dester leychtlicher  
von disem stinckenden kaat mögē  
erlediget werden.

Wolan dieweyl wir dann zu  
menschen reden / so wöllend wir  
sy fragenn / Warumß solle man  
dann nach reychthumb stellenn?  
So



So werdend sy on zweyfel ant-  
worten / Wir thünds zu aufent-  
haltung vnfers läbens / Item  
zum wollust vnfers leybs / vnd  
dann auch daß wir durch reych-  
thumb zu eeren vnd hohen  
ämpteren mögend kommen / die  
der reychthumb anhangen / vnd  
damit wir vns auch mögen re-  
chen an denen die vns beleidigen /  
vnd damit vns auch yederman  
föchte. Ich acht es seyen nicht vil  
andere vsachen / daruñ man der  
reychthum nachstellt / wie yetz er-  
zellt / als da ist wollust des leybs /  
vmb der eeren vnd ämpteren wil-  
len / vñ daß man einen föchte / vñ  
daß sich einer gegen dem anderen  
möge rechē / dan ye die reychthum  
machen niemands witziger / oder  
züchtig / oder barmherzig / sy ma-  
chē auch niemād fürsichtiger / frō  
od freündlicher / sy Bewegē auch  
kein zornmütigē zur sanfftmutig-  
keit / sy leeren auch den vnkeüschē



kein reinigkeit / sy leeren auch nitt  
die maßigkeit vnd zucht / oder an-  
dere dergleychen tugenden. So  
dā die reychthumß den tugendē  
des gmüts mögen wenig helffen /  
den menschen auch wenig erbesse-  
ren / wer wolte dann d̄ reychthum̄  
zū vil nachstellen vnd anhangen?  
dierweyl sy doch kein tugend dē ge-  
müt gebenn / sonder vil mer / so sy  
ein tugentreych vnd gehorsam ge-  
müt finden / verwüsten sy das sel-  
big / vñ für die tugenden / bringen  
sy im gegenteil vil mer lasterenn /  
dann der reychthum̄ volget nach  
aller vberfluß / als da ist zorn / vn-  
maßigkeit / vnßinigkeit / vngerech-  
tigkeit / hoffart / vñnd stolzmüt /  
vñ alle böse begirden zc. Das wöl-  
len wir auff ein ander mal hand-  
len.

Die aber so im Spital des geytz  
siech ligen / hören nit gern von den  
tugenden / oder auch von den la-  
steren predigen / vrsach / sy läbē im  
sauß



fauff vnd mögends nit hören. Wir  
wollen aber nun forthin disputie-  
ren / ob doch etwas wollusts oder  
eerlichs in der reychthumb gefun-  
den werde / vnd wollen solichs an-  
sehen zu Bewären von den kostli-  
chen malzeyten / inn wellichen die  
prachtige reychthüß gelobt wirt /  
vnd wollen aber vergleychen den  
tisch des reychen vnd armen / vnd  
irer Beder malzeyt / damit wir mö-  
gen sehen / wellicher malzeyt mer  
rechten vnd waaren wollust has-  
be.

Der reych sitzet schier den ganz-  
en tag zu tisch / steuret sich auff  
seine ellenbogen / mit denen er sich  
hin vnd wider leinet / Item imbiß  
muß auch glych dz nachmal nach  
volgen / damit sy iren Bauch span-  
nē wie ein trumē / sich auch vber-  
laden / also beschwären sy sich mit  
sauffenn / daß die Seel inn weyn  
schwimmet / daß weder augen / noch  
die zungen / oder die füß jr ampt

d



mögen außrichten / vnd ist jr glied  
maß mit den Banden des weyns  
herter gebundē dan mit einer ket-  
ten / sy schlaaffen mit vnruwen / &  
schlaaff ist inē auch vngsund / dan  
sy erschrecken im schlaaff dz sy toll  
vnd vnstüig werden / vnd sich wil-  
liglich dem teüfel ergebē / damit  
sy jederman / auch irem eignen ge-  
sind / zu spott vñ gelächter werdē.  
Sy haben auch in keinen dingen  
vndercheid / sind vnempfindlich  
vnd vnwüßend / sy können weder  
hören noch reden / die man vō tisch  
mit iren stinckendē seyten zu betch  
tragen muß. Wer wolt aber sa-  
gen / daß in solchen zechen wollust  
were.

Es ist aber wollust inn denen  
malzeyten / da die armen sind / in  
denen man so vil isset vnd trinckt /  
so vil notwendig ist zu settigē den  
hunger vñnd durst. Soliche ord-  
nung leert die natur zu haltē /  
die böse begirden aber habend die  
vers



verderbung erfunden. Darzu ist  
auch in den malzeyten der armen  
gesundtheit/ dann sy Bleyben bey  
irer vernunfft/ sy stehen auch auf  
von iren malzeyten mit vernunfft  
te/ vnnnd eerlichem/ vnnnd one Bes  
schwörung ires leybs / werden  
daruon vil stercker/ vnnnd erbesse  
ret/ gehen daruon mit aller fröu  
digkeit vnnnd gesundtheit. So du  
aber meinen worten nit glauben  
wilt/ so Beschaw beiderley / leyb  
vnnnd Seel/ so wirst du Befinden/  
das die leyb deren so sich mit speys  
nit vberladen/ stercker vnd gsun  
der/ auch feister sind/ dann deren  
so voll sind. Du solt mir hie aber  
nicht fürhalten die Franckheiten/  
die sunst auß anderen vrsachen zu  
fellig sind/ dann soliche haben an  
dere vrsachen / die wir wöllen las  
sen anstehn.

Derwegen sagen wir/ das die so  
in wollust vñ vberfluß lebē/ die ha  
ben schwache vñ weiche leyß / wie



Das wachs / mit haußfigen Kranck  
heiten Beladen / vnd zu allem vn-  
fal werdē sy etwan podagrānisch  
vberkommen das zipperlin / wer-  
den alt eh es zeytwirt / Brauchend  
alle zeyt die Arzget vnd artzney / sy  
sind langsam verstäds / Beschwä-  
ret / toll / als wenn sy todt weren.  
Vñ ob sy schon etwas fröud vnd  
wollusts hetten / wer wölts aber  
für fröud vñ lust halten / welchem  
anders Bewüßt / was fröud vnd  
wollust ist. Die wältweyßen Be-  
schreyben den wollust also / vnd sa-  
gen / daß wollust seye ein ding / da  
einer seinen Begirden gnüg thut.  
So aber seinen Begirden nit gnüg  
geschicht vonn wegen leyblicher  
Kranckheitenn / oder der füllerey /  
welche kompt auß vberfluß / was  
haben sy dann für fröud vnd wol-  
lust? Das nim ein exempel Bey dē  
Krancken die maßleidig sind / weli-  
chen / ob man schon süsse vnd schle-  
ckerhafftige speiß fürstelle / so sind  
sy



sy inen vil mer abscheülicher / dan  
lustig. Also gehet es auch mit den  
wollüstlern / so sy die Begirden des  
essens durch den vberfluß außlö-  
schen / so hört anch auf aller wol-  
lust vnd fröud. Dann nit die speiß  
allein / sonder die Begird der spey-  
sen bringt den wollust. Derwegen  
ein weyser Philosophus der in di-  
sen dingen ein recht vrteil / vnd  
auch recht philosophieret hatt /  
sprach:

Der von speyß vnd tranck ist voll  
Dem schmeckt auch das honig nit wol.

Hienit hat er wölen anzeigen /  
daß der wollust nit ist (wie wir ge-  
sagt haben) von natur der spey-  
sen / sonder in der krafft der Begir-  
den. Dann als der Prophet Da-  
uid anzeigt die wunderwerck / die  
Gott in Egypten vnd in der wü-  
ste gethon / spricht er: Er hat sy ge psal. 80.  
setzigt vō dem honig des velsens.  
Nun so finden wir nirgend in hei-  
liger geschriefften / daß honig von



felsen geflossen seyn / wie redt dan  
die gschrieffte also darvon: Das solt  
du aber also verstehn / Als die kin-  
der Israels / nach langer reis vnd  
arbeit / in der wüste müd wurden  
vnd durstig / da hat inen Moses  
das kü Wasser auß einem durren  
felsenn herfür bracht / welches sy  
dann mit grosser Begird getrun-  
cken habenn / darumb das es inen  
durst in solcher Begirlichkeit gesetti-  
get hat. Soliches nun die gschrieffte  
honig nennet / nicht darumb das  
des wassers natur seye zu honig  
wordē / sonder das wasser den dur-  
stigen Israeler vil bas geschmō-  
cket hat / dan die süffigkeit des ho-  
nigs.

108. 109. Dieweyl dann dem also (daran  
niemandt zweyfelt / er seye dann  
zänckisch oder wansinnig) so ist  
es doch ganz offenbarlich / das  
die schlechten maalzeyten / vnd  
speys der armen / vil fröud vnd  
rechten wollust habenn / Darge-  
gen



gen aber die malzeyten der reys-  
chen vnnnd der füller / seind ver-  
flucht vnnnd abschëuhig / voller  
siechtagen vnnnd vnflats / wie  
dann ein weyser mann daruon re-  
det.

Des reychen tisch ist kostlich bereit  
Doch sein vberfluß bringt vil schwach-  
heit.

Nun aber sprichst du weyter /  
Ja lieber / der reychthum hat der  
kompt zu eeren / vnnnd mag sich ei-  
ner dest Bass an seinen feynden re-  
chen / daruon mag man wol nach  
reychthum stellen / damit mā mö-  
ge güter ding seyn / vnnnd sich re-  
chen / vnd möge seiner eergeytig-  
keit gnüg thun / welches dann zu  
höheren ständen fürderet / macht  
vns auch vor der wält ansichti-  
ger. Aber man solte derwegen die  
geytige reychthum dester mer  
fliehen / dieweyl solche meinungen  
die mensche zu wilden thieren ma-  
chet / vnd sterckend damit jr hertz.



Solche reychthum bringt vns da  
hin / daß wir der waaren vnd him  
lischen reychthumb vergessen / sü  
chen auch falsche vnd geferbte eer  
die nit warhafftig / sonder allein  
den nammen vnd scheyn hat. Es  
ist mit der Betrügliehen reychthūß  
eben wie vns das angesicht einer  
hüren / das von art häßlich vnd  
vngschaffen ist / vnd doch mit Be  
trüglichen farben angestrichen /  
die vnwüssenden zu Betriegē / daß  
das so häßlich ist / wirt vnder den  
farben bedeckt. Also gehet es auch  
mit der reychthumb zu / die vnns  
schmeichlet / vnd sich dermassen  
darstellt / als seye sy gar eerlich.  
Vnd wiewol das gemein volck den  
reychen / so Richter oder Rathsh  
herren werden / vnd durch reych  
thumb zu eeren kommen / mit wor  
ten lobet / vnd glück wünscht / so  
ists doch nichts anders dann ein  
gleychfnerische eer. So du aber  
solcher leüten gewüßne vnd con  
scientz



sciencz soltest warhafftig Befragē  
so wirstu erfahren / daß sy dich wur  
den treffentlich verklagen vñ schel  
ten. Das merck darbey / So bald  
man dein gwalt nit mer fürchtet /  
vnd der pomp des prachts aufhört  
ret / so hörst du nichts anders dan  
nachreden / vber den so ein reycher  
Kathsherr oder Richter gewesen /  
sy schelten vnd klagen vber in / vñ  
thuns aber gerad die / welche dich  
vorhin gelobt haben / Vnd wol  
test aber du solchs für ein eer hal  
ten: oder solliche eer durch reych  
thumb bekümmern: welche ob sy  
dir schon selbs zufile / so soltest du  
sy (wo möglich) lassen faren / so  
doch mer hassz dann gunst einer  
von der wält erlanget.

Wilt du aber wüßenn / was die  
waare eer ist: So merck also: War  
haffte eer sind die tugenden des ge  
müts / die auch der Keiser niemāt  
mag geben / sy wirt auch nit vber  
kommen mit schmeichlerey / man



erkaufft sy auch nit mit gelt. Dar  
umb rechte eer ist vnberüglich/  
on alle gleychfnerrey / sy ist nit ver  
borgen / man kan sy auch nit erer  
ben / niemand beschiltet sy / niemā  
ist iren vndanckbar / sy wirt auch  
in keinem zeyt geänderet / vnd ley  
det auch keinen Tyrannen / auch  
kan sy niemand (wo sy gemalet  
ist) abticken.

¶ Nun sagst du aber / Lieber ich  
süche die reychthum darumb / dz  
ich mich an meinen feynden möge  
rechen / diweyl yederman den ar  
men vnder den bandt stoßt. Aber  
ich sage dir / man solte derwegenit  
(diweyl du dise vrsach achtest für  
die fürnämste) die reychthum de  
ster mer fliehen vnd faren lassen /  
vnd die armüt lieb haben / Dann  
so du dich mit dem schwerdt der  
reychthum wilt rechen / so thüst  
du wider dich selbs / darzu so vber  
trittest auch Gottes gebott / da er  
sagt / Wir gehört zu die raach / ich  
wils

Deut. 32.  
Rom. 12.



wils widergelten. Wilt du aber  
wüßsen was böses volge auß dem  
raach: Erstlichen beraubt er die  
menschen der Barmhertzigkeit  
Gottes/macht auch die gnaden  
Gottes hinderstellig/wie dann im  
Euangelio beschriben / daß der  
Knecht so zehent tausent pfundt Luc. 18.  
schuldig / vnd aber gnad von  
seinem herren begärt vnd auch  
erlangt hat / vnd er aber gegen  
seinem mitknecht vnarmhertzig  
war / der im doch nicht mer dan  
zehent groschen schuldig / daß doch  
ein kleine summ war / darumb er  
sich an seinem mitknecht versün-  
diget / vnd derwegen wie er vn-  
armhertzig an seinem mitgsellen  
war / hat er auch ober sich selbs  
ein vnarmhertzig vrtail gefellet /  
daß er auch die erlangete genad  
verloren / vnd ward darzu auch  
den peynigeren vbergeben / vnd  
die ganze Summa mit gros



ser peyn vnd straff müssen Bezahlen/vnd dieweyle raach begärt/hat er auch die gnad vnd verzeyhung seines herren verloren/ıc.

Woltest du aber gern die reychthumb darumb haben/damit du ein ringere wäg hettest zu der verdammnis? Das seye feer von dir. Derwegen wir sy destker mer fliehen sollen/als ein vsach vil böses. So hast du aber ein eynred/vnnd sagst/ Es ist ein schwar ding vñ die armüt/dañ sy bringe die menschen in Gottslesterung/vnd offte vneerlichs vnd vnbillichs Begehn. Du solt aber wissen/das soliches nit die armüt thut/sond die Kleinmütigkeit. Der arm Lazarus ist mer dann arm gewesen/vnnd darzu auch seer schwach/mit schwären krankheiten/welche die armüt destker schwärer gemacher hat/dann die krankheit bedarff vil hilff vnd trosts/welches der armenit kan zu wegen bringen.

Vnd

Luc. 16.



Vnd so einer derenn nur eins  
hat / so hat er doch schmerzens ge  
nüg / ich geschweygē so einer sy bei  
de hat / das ist die armüt vñ träck  
heit / vnd ist aber sunderlich Bes  
schwerlichē so niemand hilff thüt.  
Es ist eben wie ein feür das nicht  
zū löschen ist / vnd wie ein schmerz  
der nicht zū heilen ist / vnd wie ein  
schiffbruch dem man nit entrinnen  
mag / vnd wie ein feür das leib vñ  
seel brennt. Es hat aber diser La  
zarus noch vil schwärers erlitten  
namlichen / daß er müßt vor augē  
sähen / wie der Keychman so kost  
lich läbt / darzū hat es in noch vil  
schwärer bekümmeret / daß er an  
der thür des Keychen lag / darmit  
so er sähe die reychthumb des Key  
chens vor augen / er dester bas ge  
creüziget wurde / welches in dan  
vil mer wee hat gethon dann sein  
armüt. Dann es thüt vil mer wee  
so einer müß manglen derē güter  
die er sieht / dann so er manglet de



ren die er nicht sieht.

Desse aber hat sich der vntreüw  
Keychman nicht lassen bewegen/  
sonder er heist im / wie sein Brauch  
war / ein gütt maal mit allem v̄  
berfluß zürüsten / vnd alle dienst  
barkeit Beweyssen / allerley weyn  
eynschencken / die vile der Köchen  
vnd andere Bauchdiener / auch vi  
le der Sanger Bestellen / darmit  
nichts manglete an seinem vber  
fluß vnd füllerey. Aber der arm  
Lazarus müßt grossen hunger  
leyden / vnd war auch darzu mit  
grosser Franckheit beschwärt / hat  
te auch niemands der im dienet /  
oder einigen trost von dem Tisch  
des Keychen (an wellichem sassen  
die schleckmeüler / fresser / vnd  
füllzapffen / wellichen der Bauch  
vor völle spannet) brächte / ja es  
mocht dem armen Lazaro nicht  
ein brösamlin Brots zu teil wer  
den. Er hat aber sollichen grau  
samen hunger gedultig tragenn /  
vnd



vnd kein böß/oder lester/oder vn-  
billichs wort lassenn auß seinem  
mund gehen/sonder wie das gold  
ye mer es glüyendig gemacht  
wirdt/ye seüberer vnnnd reiner es  
wirdt. Also auch Lazarus ist mit  
vilerley leyden vnnnd creütz bewä-  
ret worden / vnnnd durch sein ges-  
dult vil schöner vnnnd scheynbar-  
er worden. Wir sähen vil maler  
die nidrigen/die jr narung zimma-  
lich habenn / vnnnd ein kleines ges-  
sindlin erhaltend / werdend offte  
vnlustig vnnnd vnwillig wider die  
reychen. Was vnlust solt wol Las-  
zarus gehabt habenn / der gar  
arm/vnnnd verlassen / vnnnd aber  
nit allein arm/sonder auch kräck  
war/vñ also krank/dz seins gley-  
chen nit gfunden ward/ja d auch  
gar kein diener hatt/noch trost in  
der statt / da der Keych gewonet/  
vnd ist da gelegen als wenn er inn  
einer einöde wer/aufgehungeret  
vnd mangelhafte an allen dingen



Dem das schlemmeit vnd prassen  
des Keychen (das er vor augen sa  
he) dester mer den hunger bewegt  
hat. Er müßt sahē wie der Keych  
mit aller völle vberschwēpt war/  
vñ er abervon niemand kein trost  
hatte / vnd daß allein die hündlin  
sich seinen erbarmten / die er von  
schwachheit nicht hat mögen hin  
weg treyben. Derwegen wer La  
zarus nit ein liebhaber d höchster  
weyßheit gewesen / wie hette er sol  
ches alles so treülichen mit gedult  
mögen tragen ? Da sihe nun wie  
Lazarus / der sich selbs nit geschä  
diget hat / von niemand hat mö  
gen geschediget werden. Ich müß  
solchs mit kürze wideräferen / da  
rumb sag an / was hat der leiblich  
siechttag / was hat der mangel al  
ler dingen / oder was haben in die  
hündlin / so im die gschwär gelect  
oder des hoffertigen Keychen vn  
treüw (als er im vor d nasen lag)  
Dem herrlichen kämpffer Gottes  
La



Lazaro schaden gethon / dieweyl  
er in allen disen anfechtungen nit  
Kleinmütig worden / vnd von den  
tugenden seines gemüts nit abge  
fallen / vnd ja freylich nit abgefal  
len / sonder in mangel aller dingē  
vil stercker worden / darumb die  
Kron des sigs er erlangt hat / vnd  
im dem die wält in vnglücksälüg  
hat geachtet / durch dasselbig hat  
er den palmen des sigs erlangt /  
vñ für sein schmerzenvñ schmach  
hat er erlangt die ewig belonung.  
Sein zeytlicher mangel hat im zü  
bereit die zükünfftige güter / Sei  
ner Kranckheit ist nachgefolget dz  
ewig läben / die geschwär / welche  
die hündlin gelect haben / die has  
bend in zü eeren gebracht / daß er  
durch die dienstbarkeit der Eng  
len ist in den himel getragen wor  
den. Das grausam vnd vbel sehē /  
vnd vnsreündlichkeit des Key  
chenmanns (als Lazarus vor sei  
nen augen an der thür im betth



lin lag) hatt Lazaro zu wegem  
bracht das er in des h. Abrahams  
schoß ist getragen worden / vñ die  
ewige sãligkeit erlangt.

Es ist nit vnbillich das wir den  
heiligen Apostel Paulum wider  
anziehen / der mit vnzalbarlichen  
creüzen versucht vnd genidriget  
worden. Nun aber was hat es in  
doch geschediget? Ist er aber nit  
in allen dingen vil herrlicher wor-  
worden: Lieber was hat in gesche-  
diget? der hunger? die Keltin? die  
Blöße: das geißlen: die streich: das  
versteinigen? was schadens hatt  
er aber im schiffbruch vnd inn der  
tieffe des meers empfangen? Er  
ist allwegen in selbs gleych blibē/  
vnd eben der selbig Apostel bliben  
vnd genennt worden.

Matth. 10. Dargegen aber war Judas ei-  
ner auß den zwölffen / vñ ein Apo-  
stel Christi genent / aber es hat in  
nit mögen helfen / dz er einer auß  
den zwölffen war / vnd Apostel ge-  
nennet /



nennet / Sieweyl er die tugendē des  
gemüts nit hatte. Der heilig Paul  
lus aber hat alle seine reisen ge  
thon / mit grossen mangel / vñnd  
hat vil streich erlitten / mit denen  
ist er zu himel kommen. Aber Ju  
das / wiewol er vor Paulo ist zu dē  
Apostolischen ampt kommen / vñ  
mit anderen Apostlen gleyche ga  
ben empfangen / vñnd die himmlis  
schen philosophey gelernet / vñnd  
auch teilhafftig worden des tischs  
des Herren vñnd seines würdigen  
Sacraments / vñnd hat auch ge  
habt die gaaben des h. geists / mit  
welchen er die todten erweckt / die  
außserzigenn gereiniget / vñnd die  
Teüfel außgeriben. Vñnd als er  
vonn Christo vil predigenn vñnd  
verlassung zeytlicher güter ge  
hört / darzu hat Christus im auch  
Befolhen die schaffnerey vber die  
armenn / damit dem verborghen  
laster des geyts / so inn seinem  
Hertzenn gewurzlet / möchte



geweert werdenn / dieweyl er ein  
dieb war / vnd wiewol Christus vi  
lerley mit im versücht hat / doch so  
hat es alles nichts geholffenn zur  
Besserung. Es hat aber Christus  
wol gewüßt den geyt Jude / dz er  
vmb des gelts willen wurde ver  
derben / darumb dann in Christus  
nit allein von wegen des lasters  
gestraafft hat / sonder auch mit  
heimlichen Worten gwarner / vnd  
diaweyl er lust gehabt mit dē gelt  
vmbzügehn / hat im der Herz den  
seckel Befolhen / auff das so er mit  
dem gelt vmbgienge / von den gey  
tigen begirdendester ee abstünde /  
damit er sich nit verderbte / vnd  
an dem Kleinen ampt / gelt außge  
ben vnd eynnemmen / den diebstal  
möchte verhüten.

Also geht es zu in allen dingen /  
wer sich selbs nit schedigt / wie Ju  
das / der wirt von niemands mö  
gen gschediget werden. Also auch  
im gegenteil / wer sich selbs nicht  
straf



straaffen vnd Besseren wil / vnnnd  
aber so vil an im ist / seinen müt-  
willen erfüllen / dem ist nit wol zu  
helffen. Die heilig gschriffte aber  
zeigt vns an ein grossen spiegel d  
väteren des alten Testaments /  
lāben vnnnd thaaten / von Adam  
an bis zu der geburt Christi / dar-  
innen du sähen wirst etlicher fāler  
vnd sünd / vnnnd denn etlicher sig  
vnd kron / damit du auß beden tei-  
len möchtest erlernen / dz niemāde  
von einem anderen mag geschādi-  
get werden / er schedige dann sich  
selbs / ob schon die ganze wālt sich  
wider in aufleint / oder im die zeyt-  
lichen güter entwendt wurdenn /  
oder ob schon die gwaltigen Für-  
sten vnnnd Tyrannen wider in er-  
grimpten / vñ im yederman nach-  
stellet / gefreündte od vngesfreünd-  
te / Bekannte oder vnbeKannte / sy  
thüyends mit listen oder gewalt /  
oder Betruglichem nachstellen / so  
mögen sy doch nit im geringsten /



Den/so dapffer ist / vnd wacher in  
den tugenden seines gemüts / etz  
was schedigen. Aber im gegenteil  
das sind die / so nit wachen in den  
tugenden / wirst du es nicht besser  
machen / oder dem mögen helfen  
der faul vnd träg ist / vnd laßt  
seine vngeschicklichkeit selbs mer-  
cken / vnd verzagt / ob du schon  
tausenderley mit im versüchst / in  
zu bewaren / es seye dann das er  
vorhin ein güten fürsatz habe vnd  
Beweyse. 2c.

Luc. 7.

Solchs zeigt vns an die gleych-  
nuß die von solchen leüten geschri-  
ben ist / wie der Herr sagt / da einer  
Bauwer sein hauß auff den velsen /  
vnd ein anderer Bauwer auff den  
sand / nit daß wir solches von dem  
materlichen sand / oder velsen / o-  
der von heüseren / von holz vnd  
stein gebawen / vnd von natürli-  
chen wassergüssen / räge vñ wind  
sollen verstehen / sonder daß wir  
dardurch sollen verstehen die tu-  
genden



genden des gemüts / vnd auch die  
versaumnus vn̄ farlässigkeit / vn̄  
lernen verstehen die tugenden des  
gemüts / daß der so sich selbs nicht  
schädiget / von niemand mag ge-  
schädiget werden / dieweyl kein rä-  
gē noch wasserguß / oder die grau-  
samen wind / haben das hauß nit  
mögen bewegen / das auff den vel-  
sen gebauwet war / darauff vnns  
wirt züuerstehn geben / daß der so  
sich selbs nit schädiget oder dar-  
gibt / oder vō im selber nit bewegt  
wirt / so mag in kein versüchunng  
oder anstoß bewegen vn̄ zü hauff-  
feu werffen.

Der and̄ Bauw aber mag leych-  
tlichen nider geworffen werdenn /  
nit von wegen des gewalts / oder  
anstoßenden winds / oder andere  
versüchnus (dann ye das ander  
gebeüw müßt auch zü hauffen fal-  
len / so es aber beständig bleybt)  
sonder von wegen des schwachen  
fundaments / dan̄ der sand reyser



vnd weycht gern/welchs on zwey  
fel anzeigt die vnstandhaftigkeit  
oder Beweglichkeit der gmüteren.  
Derwegen die anfechtung nitt ist  
die vrsach des fals / sonder die vn-  
beständigkeit vnd faulkeit / dann  
auch die güten gebeüw fallen et-  
wan on anfechtung gern / als wol  
als die so auff den sand gebawet  
sind / ob schon kein wind oder was-  
sergüßz daran schlagen / doch dies  
weyl der sand allgemach weycht /  
so fällt doch zum letstend as hauß.  
Als auch der Adamant nit bricht  
ob man in schon mit hammersen  
schlecht. Also wirt auch niemand  
geschediget / ob man schon hart  
auff in schlecht / mag auch von nie-  
mand geschediget werden / es seye  
dann daß er in selbs schaden thut.  
Aber der so sich selbs auß eigener  
farlässigkeit versaumpet (der selb-  
big ob in schon niemandt darzü  
treymbt) fällt er ab / vnd wirdt zu  
nichten.

Tim



Nim nun für dich das exempel  
Jude/welcher/wiewol er kein eüf-  
ferlichē treyber hat gehabt/sond  
im gegenteil vilerley hilff vnd gü-  
thaaten/doch hat er gfült vnd ist Matth.26.  
nit beständig bliben. Ich wil fort-  
hin solchs nit allein mit sunderli-  
chen personen vnd exemplen/son-  
der mit dem gangen volck Israel  
bewären. Ach wie hat Gott für  
das selbig volck mit seiner fürsich-  
tigkeit sorg getragē/ Ja Gott hat  
schier alle creaturen inen zur Bes-  
serung zugerüstet. Er hat inē für  
alle andere menschen ein neüw vñ  
herrlich Gesatz des läbens geben. Exod.20.  
Sy sind trockens füß durch das Exod.14.  
rotmeer gangen / vñnd erhalten  
worden/aber ire feynd ertrunctē.  
Sy haben vierzig jar in der wü-  
ste on pflug vnd säyen geläbt/ha-  
bend weder geerndet noch getrö-  
schen/sy habend weder gemalenn  
noch Brot Bachen. Ire weyber ha-  
ben nit gespunnen noch genäyet/



Exod. 16.

Psal. 104.

sy haben nit dörffen zu marckt gehen / haben auch fleisch nicht inn der mezzg kaufft / Aber Gott hatt inen soliches in der wüste alles zügericht / on alle mühe vund arbeit. Das Mann vund himmelbrot hatt solliche art vund natur gehebt / des sy auch alle tag haben frisch geessenn / das es einem yedenn nach seinenn begirden geschmöckt hatt. Auch ire Kleider vnd schüch sind nicht zerbrochen / noch ire eigne leyb nicht schwach worden. Derwegen sy weder Arget noch arznei bedörfft haben / wie dann David sagt / Er füret sy auß mit Silber vund Gold / vund war kein kranker inn iren stämmen. Es handelt Gott auch mit inen / als wenn sy nicht mer inn der Wält wären / sonder wären inn ein besser läben kommen / dieweyl inenn Gott speys vund tranck on sorg vund arbeit / vund seines worts wegen darreichet / zc.  
Das



Das war aber auch ein groß miß Exod. 13.  
racketel / daß in dem Gott im tag ein  
wolcken vñnd schatten gemacht /  
damit die Sonn sy nicht Brennte /  
vñnd wohin sy zogen / war es ein  
decke ob irem haupt. Sy habend  
auch zu nacht irem trost gehebt /  
mit der feürigen seülen / welche  
durch Gottes wort ist angezündt  
die nit allein zu nacht inen hat ge  
zündet / sonder hat inen auch den  
wäg angezeigt in der wüste. Was  
solich mer sagen ? Der hart vels Exod. 17.  
hat in dem vberflüssig wasser ge  
ben. Gott hat inen die wachtlen Exod. 16.  
gebenn / die das Land erfüllt ha  
bend mit grossen hauffen.  
Solte ich erzellen die wunder  
werck so in Egypten Beschehen /  
wäre es lang zu erzellen / ich ge  
schweyg anderer thaaten / so in d  
wüste Beschehen sind / Sy habend Exod. 17.  
gekriegt / vñnd allein durch das  
gebätt / mit Gottes hilff obge  
legen / dan durch das außstrecken



Josue. 6.

Der hende Mose haben sy gesiget/  
vñ was jr Krieg inen als ein Kurtz/  
weyl. Ich kans nicht alles erzellen.  
Sich zü die vorhin durch das rot  
meer gezogen waren/ vnd dz was  
ser inen zü beiden seytenn sich wie  
ein mauren aufgestürt hat/ sy zü  
Beschirmenn/ die habenn auch die  
mauren Jericho mit den pusau/  
nen vñ geschrey zü hauffen ge/  
worffen/ also daß das geschrey ge/  
gen den feynnden ein grösser ansä/  
hen gehabt hat/ dann der hauff d  
Kriegsleüt/ haben mer durch solli/  
ches geschrey züwegen bracht dan  
mit stürmen.

Dise wunder aber vnd zeichen  
sind darumb beschehen/ nicht daß  
Gott sein volck hat also brauchen  
vnd üben wollen/ sonder daß die  
leer der erkantnuß Gottes/ die i/  
nen Gott durch Mosen gebē hat/  
von inen dester vester vnd gewüßli/  
cher glaubt wurde. Solche ding  
alle waren ein solliche predig / die  
dann



Dann anzeigt / daß der einig Gott  
aller dingen ein Herr ist / das prez  
diger vnd zeigt an das meer / da  
die kind Israels trockens fuß hin  
durch giengend / vnd ire widersä  
cher errenckt wurden. Solliche Exod. 9. 10.  
Gottes herrlichkeit habend auch <sup>ii.</sup>  
angezeigt die blütige wasser inn  
Egypten / also auch die frösch / die  
hauffen der höuwschrecken / rau  
pen vnd leuß / Also haben die ande  
ren wunderwerck so in Egypten  
vnd in der wüste beschahen / Got  
tes herrligkeit verkündiget / als  
da sind das Man vnd himelbrot /  
die feürige seülen / die menge der  
wachtlē / sampt anderen wunder  
wercken / welchs alles inē war als  
ein büch / vñ geschriefften / die man  
nit mag außtilgken / vnd auß dem  
büch irer cōsciengen nimmer solt  
abgethon werden / darinnen sy solt  
ten gestudiert haben / vnd in iren  
herzen alle zeyt behalten.

Aber yedoch hat es alles nichts



geholfen. Dann nach solichen of-  
fenbarlichen zeichen die auß Got-  
tes Krafft beschahen / vnnnd Gott  
die Israheler vber alle menschen  
erhöcht vnd eerlich gemacht hat /  
seind sy an Gott meineidig vnnnd  
vndanckbar worden / Dann nach  
dem allem / haben sy inen das gul-  
din Kalb aufgeworffen / vnnnd an-  
gebätter / vnd frömbden Götter  
nachgefraget.

Vnnnd wiewol solche gewaltige  
Gottes wunderwerck noch vor au-  
gen / vnnnd inn frischer gedäch-  
nuß waren / daß solliche gedäch-  
nuß inen Billichen nit solt auß dem  
herzen kōmen seyn / doch halff es  
nichts. Sich aber im gegēteil / wie  
die Tiniiten / ein heidnisch vnnnd  
roß volck / das noch nit sunderli-  
che (der Göttlichen fürsichtigkeit)  
gütthaaten empfangen habend /  
auch kein gesag gehabt / auch kein  
erleuchtung oder wunderwerck /  
oder von Gottes Befelch / oder wer-  
cken

3one. 3.



cken etwas gewüßt / Doch so bald  
sy gefähen haben den Propheten  
Jonam / der vom schiffbruch ent-  
trunnen war / darzü inenn vnbes-  
kantt. So bald aber Jonas in die  
statt geht / vnd prediget / sagende:  
Ober vierzig tag wirt die Statt  
Niniue vndergehen. Gleych von  
stundenan nach diser predig ha-  
ben sy sich zu Gottesforcht beuert  
vnd von sünden abgestandē / sich  
begeben zu frombkeit vnd tugend-  
den / durch die büß mit solcher Bes-  
serung / daß Gott sein zorn vnd  
sentenz hat nachgelassen / vnd die  
Statt die yegunder solt vnder-  
gangenn seyn / ist aufrichtig blis-  
ben. Dann Gott sahe / spricht die  
geschriffte / daß sich ein yeder von  
seinem bösen wäg hatte abgewen-  
det. Nun aber sag mir an / Wie  
ist ein jeder von seinem bösen wäg  
abgewichen: so doch jr Bosheit bis  
in den himmel gereicht hat / vnd  
hetten grosse schalckheit begangē



denen nit zu helffen war. Der pro-  
phet Jonas zeigt an / als er sagt:  
Ihr Bosheit hat Bis in den himel ge-  
reicht. Durch das wörtlin aber  
Bis in den himmel (welches doch  
ein grosse weyte ist) zeigt er an die  
grösse der sünden. Vnd aber sol-  
che grosse Bosheit die Bis in himel  
gereicht hat / wirdt von einer pre-  
dig die in dreyen tagen beschehen  
von einem unbekanntem / frömb-  
den vnd schiffbrüchigen menschen  
vnd mit kurzen wortē gebesseret /  
ausgelöscht vnd außtilget / das  
sy ein soliche zeügnus vberkom-  
men / wie die gschrifft sagt / Vnd  
Gott hat gesehen das ein yeder ist  
von seinem Bösen wäg abgestan-  
den / vñ Gott gereüwt die straaff  
die er inen hat wöllen zufügen.

Zone. 3.

Da merckst du aber / das der so  
fleyssig ist / vnd wachet / vnd auff  
sich selbs acht hat / wirt nit allein  
von den menschen nit geschädiget  
sonder er wendet auch ab den zorn  
Gottes.



Gottes. Der sich aber selbs ver-  
warloset vñ schediget / vnd ob im  
Gott schon tausenderley eüsserlich  
cher gütthaaten beweyßt / so ist es  
im doch nit fürderlich zum ewigē  
lāben / dieweyl auch die Juden nit  
hat mögen helffen die grossen wū-  
derwerck die Gott an inen gethon  
hat / Es hat aber auch den frōm-  
dingen vnd Heiden nit geschadet /  
daß sy deren wunderwerck keins  
haben gehabt oder gesāhen / dan  
die so vnder den Heiden / redlich  
vnd eüsserlich frōm / sich dem ewi-  
gen vnd rechten Gott ergeben / ha-  
ben darauff ein vrsach genomēn /  
vñ jr lāben gebesseret / wiewol jrē  
vil vngelerter / vnd frōmbding /  
vnd vom gesatz Gottes nichts ge-  
wüßt haben.

Nun wollen wir auch anziehē  
die drey Knaben / von wellichen im  
propheten Daniel geschriben / die Daniel. 3.  
vil erlitten haben / doch hat der sel-  
bigen Knaben gemūt nichts mögē

f



Brechen oder schädigen / sy waren  
noch zarte kinder / vnd waren inn  
ihrer jugend in die Babylonisch ge  
fängtnuß hingefürt vnder ein  
frömbd Regiment / entsetzt ires  
vatterlands vñ eigener wonung /  
auch beraubt des Tempels / vnd  
väterlichen satzungen der opffer  
der gsatzlicher reinigung. Sy wa  
ren auch abgezogen von den Lob  
gesängen vnd Psalmen / zu Heid  
nischem gottsdienst / vnd müßten  
seyn vnder dē Heidnischen gwalt  
die nicht als menschen / sonder als  
wilde thier sy Beherrscheren. Sy  
haben auch kein stimm mer Gött  
licher leer gehört / noch propheti  
sche warnung / sy haben kein trost  
von irem priester vnd vorsteher ge  
habt. Derwegen sy also gebätret  
habend / Es ist zu disen zeyten  
kein Fürst noch Herzog / auch kein  
Prophet oder Brandopffer ꝛc. vor  
deinem angesicht / daß wir möch  
ten gnad erlangen / ꝛc.

Daniel. 3.

Darzu



Darzu ist es ihnen beschwärlis-  
chen gewesen / daß sy zu hof ha-  
bend müssen wonenn / vñnd war  
ihnen nicht anders / als wenn sy  
auff dem Meer hetten geschwäs-  
bet vñnder allerley vñngewitter vñ  
wasserwällen / wie ein Schiff das  
mittenn innm Meer vom wasser  
getriben wirdt / vñnd hat keinen  
Steürmann oder Schiffleüt / on-  
sägel vñnd rüder. Dierweyl sy a-  
ber inn irem gemüt / Göttliche  
weyßheit hattend / vñnd wußtend  
auch daß man alles zeytlich solz  
le verachten / vñnd den gwalt (der  
doch schwach ist / vñnd aufgeblas-  
ne hoffart) seye zu verachten / ha-  
ben sy sich auff Gott innm glau-  
ben gelassen / vñnd auff die him-  
lische güter gesähen / habend auch  
den Küniglichen hof nicht an-  
ders geachtet / als ein stinckens-  
den kercker. Es hatt der Künig  
auch gebottenn / daß man sy von  
seinem Tisch gespeysset hatt / an



welchem aller vberfluß vñ pracht  
war/voller vnreinigkeit vnd ma-  
ledeynung/den habend sy für ein  
greüwel geachtet/vnd sind gewes-  
sen wie die schäfflin vnder dē wöl-  
fen/darumb daß sy haben müssen  
von der unreinen speyß essen oder  
sterben. Was thünd aber die gü-  
ten Knaben: wie haltet sich dz zart  
alter (das ist die jugend) in irer ge-  
fängtnuß. Sy sagen nicht/Gott  
weist wol daß wir darzü gezwun-  
gen werden/daß wir vnder einem  
Tyrannen/gefengtnuß vñ dienst-  
barkeit sind/wir vermögen nicht  
dem grausamen Tyrannen vñnd  
herren widerstehn. Aber die güten  
Knaben/haben sich deren dingen/  
sich zu entschuldigen/gar nitt ge-  
braucht/sonder haben eh wöllent  
sterben/eh sy Gott haben wöllent  
erzürnen/sündigen/vnd vnrecht  
thün. Es waren inen alle eüsserli-  
che ding zu wider/die armenn ge-  
fangnen Knaben hatten kein gelt  
da



Damit sy das gemüt des grausamen Tyrannen mochten stillen: auch konten sy im nichts von ihrer freundschaft (die Billichen soltē für sy gebätten haben) fürhaltē/ dann sy waren frömbding. Sy mochten sich auch mit gewalt nit erretten/ dieweyl sy leybeigen waren/ vnd iren nur drey waren/ vñ kein grosser hauff.

Wie thün sy aber? Eben das so noch vberig war das thün sy. Sy bitten den Kämmerling / dem sy befolhen waren/ Aber der Kämmerling forcht sich/ vñ besorgt er käme in vngnaden/ vñ vmb sein läben/ so er den Knaben solchs züliesse/ das sy geforderet hatten. Darumb er zü inenn sagt / Ich forcht meinen Herrenn den König / so er euwer angesicht wurde megerer vñ trauriger sehen dan anderer Knaben/ die inn euwerem alter sind/ vñ liesse mich den tödten. Aber die Knaben habend dem



Kämmerling mit verständigen  
worten soliches außgeredt/haben  
in beredt/das er sy hat lassen Bley  
ben.

Als sy nun alles / so vil ihnen  
möglichen/gethon haben/so thut  
Gott das sein auch darzu/ Vnd  
wie Gott das seyn darzu gethon/  
hat/also habend sy auch iren wil-  
len dareyn geben/dieweyl sy inen  
fürgenommen habend/vonn der  
verbotnen speys nichts zu essen/  
das sy auch haben dapfferlichen  
gehalten. Darum hat inen Gott  
geholfen / vnd iren guten willen  
eerlichen geendet. Da lerne aber-  
mals/das der so sich selbs nit schä-  
diget/von niemand mag geschä-  
diget werden. Vnd aber was fin-  
dest du an disen Knaben/dan eben  
Kindheit/gefängtnuß/einsame/  
leybeigenschaft / vberlegnen ge-  
walt/harte gebott/tyraney/den  
tod/auch greülichenschrecken. Sy  
haben weder gfreündte noch ver-  
wante



wannte Burger oder nachbaur-  
schafft / auch niemand der sy war-  
net oder tröstet / solches aber alles  
hat sy nit geschädiget / da sy jr ei-  
gen gmüt vnd willen nit geschädi-  
get haben. Aber im gegenteil / wie  
es obenn erzellet ist / do das volck  
noch daheimē zu Hierusalem wa-  
re inn irem vatterland / habend  
ihnen so vil eüsserlicher hilffe /  
nicht mögen zu solchen tugenden  
helffen / dieweyl sy sich selbs durch  
jr farlässigkeit / täglichs versaum-  
pten.

Aber dise Knaben / von denen  
wir yetzund reden / habend erstlich  
disen kampff bestanden / vnd  
haben sich mit verbottner speyß  
im gsatz nit wöllen beflecken. Vnd  
als sy aber mit sollichem gesiget /  
vnd das Königlich gebott der  
speyß vnderwegen glassen / ist inē  
noch ein grösserer kampff vnd  
streyt zügestanden. Dañ es wirt  
mit inē noch ein grösserer kampff



vñ streyt fürgenommen/ der gar  
grausam gewesen ist. Es wirt ein  
feüriger ofen geheitz/ vñ der wü-  
trich Nabuchodonosor wüet mit  
allem seinem rañem gesind. Es  
Bewegen sich auch greulich Persi-  
er/ vnd die vnarmhertzigen vnd  
vnuerträglichen leüt/ leinend sich  
auf dise Knaben zu betriegem/ dar  
zu Braucht man allerley Music-  
spil/ vnd ist ein neüwe art des Ty-  
rannens/ namlichen die Music/  
vnd das greulich feür zusamen  
Brauchen/ die straaff vnd der schre-  
cken des tods wirt mit wollust der  
Music vermischet. Vnd als sich di-  
se Knaben nit selbs dargaben/ son-  
der Bliben in irem güten willen be-  
ständig/ thünd auch das Gott ge-  
fellig ist. Darumb hat sy sunst  
nichts mögen schädigen / sonder  
sy werden daruon vil herrlicher/  
vnd empfaben noch vil ein Bess-  
ren sig vnd Kron dann vorhin. Na-  
buchodonosor hat sy gebunden in  
den



Den feürigen ofen gworffen / aber  
das feür hat inen keinen schaden  
zügefügt / sond vil mer nutz bracht  
vnd Tyrannische wüterey inen  
grössere eer zübereitet / als sy mit  
ten im ofen lagen / vnd der grau  
sam wüterich vil mer dann die flā  
men vber sy zürnet / haben sy de  
ster einen herrlichen vnd gwalti  
geren triumph vnd sig daruon  
bracht / ja auch dise drey Knaben  
haben das ganz volck samt irem  
Künig gar herrlichen vberwun  
den vnd gefangen / welcher eer vñ  
preyß alle zeyt wirt geprediget vñ  
gesungen. Darumb der sich selbs  
nit schädiget / mag von niemandt  
geschädiget werden / wie ich dann  
meine erste proposition vnd für  
trag vil mal äfere.

So dann / wie oben gesagt / kein  
gefängnus / kein dienstbarkeit /  
kein einöde / noch verlierung des  
vatterlands vnd der gefreündtē /  
kein tod / kein feür / kein hauffen



leüt kein greülicher Tyrann/ dise  
Drey junge Knaben / so gefangen/  
vnd leybeigen/ vnnnd frömbdling  
waren/hat mögenn schedigen/ o=  
der von Gott abwenden / womit  
wölte man dann die tugenden  
des gemüts / einem mögenn Bre=  
chen: Ja/sagst du/Gott ist inenn  
Beygestandenn / der sy auch auß  
dem feürigen ofen erlediget hatt.  
Ey so thü du auch so vil andir ist/  
vnnnd hoff zü Gott / so wurde dir  
solliches auch geben / Gott wurde  
dir auch Beystehn/ so du dich selbs  
nit darvon stoßst.

Ich aber verwundere mich nit  
allein diser Dreyer säliger Knaben  
darumb / daß sy vom feür vnge=  
schädiget blibē/ sonder daß sy sich  
so dapfferlichen gehalten / vnnnd  
von wegen des gesetzes ihrer Vät=  
teren lassen binden/ vnnnd inn den  
feürigenn ofen lassenn werffenn.  
Das war die rechte tugende/vnd  
Gott ein gefellig opffer. So bald  
man



man sy inn das feür geworffenn/  
seind ihnen die Krantz des sigs ge-  
flochten worden auß denenn woz-  
tenn / als sy mit aller dapfferkeit  
dem König antwort gaben / vnd  
sagend / Es ist nicht not daß wir  
vil antwort dir gebenn / dann vn-  
ser Gott dem wir dienend der ist  
imm Himmel / der vnns wol kan  
erledigen von deinem feürigen of-  
fen / vnd wirdt vnns o König  
auß deinen henden erlösen / Vnd  
ob ers schon nicht thun wölte / so  
solt du wissen / o König / daß wir  
deinen götterenn nicht wöllend  
dienen / vnd das Bild der guldin-  
nen seülen nicht anbätten . Mit  
disen Worten haben sy die Kron er-  
langt / vnd mit diser Bekann-  
nuß das sigzeichen erlangt. Das  
ist jr handel gewesen / darmit sy  
in waarer Bekannnuß der mar-  
ter seind veruollkommnet wor-  
den.

Daß aber ire leib von dem feür



nit sind verletzt worden / vnnnd die  
band ledig / vnnnd daß feür seiner  
art vnd natur vergessen / vnnnd sy  
mitten im ofen kület hat / wie ein  
tañ vom himmel / ist ein werck der  
gnaden Gottes gewesen / darmit  
er durch die herrligkeit seiner wü-  
derwerck / seinen gwalt jederman  
offenbaret. Dise Knaben aber ha-  
ben mit irer Bekannnuß vnd Bes-  
ständigē glauben erlangt die herz-  
liche Kron der marterer. Lieber  
was wilt du dich dann vil beklagē  
so du von deinem vatterland ver-  
triben bist / wie dise Knaben / oder  
hingefürt zū dienē in der gefengē  
nuß den vngeschlachten herren.  
Es ist disen auch also Beschehen.  
So du keinen trost hast / kein pres-  
diger oder leerer / desse haben dise  
Knaben auch gemanglet. Bist du  
gebunden vnd entblößt zum tod /  
so sich wie dise Knaben auß denenn  
dingen vil herrlicher vnnnd klärer  
sind worden. Sich aber / die Judē  
has



haben gehabt den Tempel / die Opffer / die laden der Zeügnuß / dz Cherubin / vnd den Gnadenstül / vnd die geschirr damit sy tägliche opfferten / darzü habē sy auch gehabt die Propheten / deren ein teil gestorben / ein teil läbten noch / welche sy von iren täglichen händlē Berichten / vnd sy ermanten der alten gütthaaten Gottes / die er inē in Egypten gethon hatt / vnd in der wüste / vnd in dem verlobten land. Aber sihe zū vnder denē dingen allen / haben sy sich nitt allein nit gebesseret / sonder zū aller irer voriger vbertrettung / habend sy gözen in dem Tempel aufgestellt / vnd inen ire sün vñ töchteren aufgeopfferet / darzü vnder allen böumen vnd Bergen schandtliche opffer gethon. Dise Knaben aber als sy sind gewesen vnder einem rauen volck / vnd im land irer feyn den / vnder dem Tyrannischen gewalt / vnd in das feür vnd dem



tod erkannt worden / sind derhalb  
ben nit geschädiget worden / aber  
vil mer eer erlangt.

Diueyl dann solchs vnfallbar  
ist vnd gwüßlichen / so können wir  
auch dergleychen exempel auß heiliger  
geschriefft selbs wol süchenn /  
welcher nun vil sind (wer sy ands  
süchen wil) auß denen mag man  
erlernen / daß iren vil vngesfahrlich  
heit des zeits / auch etwan on alle  
vrsach / Item on gwalt vñ zwang  
der tyränen / haben sich selbs zum  
fal geben / Vnd aber andere dars  
gegen / von allerley widersächert  
sich keinerley wegs vō iren bestän  
digen tugenden lassen abwenden.  
Derwegen sollen wir gwüßlichen  
diesen spruch für gwüß vñ recht  
halten / So yemandt geschädiget  
wirt (wie wir dann imm anfang  
fürgehalten vnd wie auch entlich  
bewärt haben) ja sag ich geschädiget  
wirt / von im selbs geschädiget  
werde / vñ sunst von niemand /  
ob



ob jr schon vil sind die da schaden  
thun.

Letstliche sag ich also/ Ob schō  
alle/die auff land vnd wasser wo-  
nen/zusamen geschworen hetten/  
yemand zu schädigen oder verles-  
gen/ so mögen sy doch keinen schä-  
digen dann den so von im selbs  
geschädiget wirt. Gott  
geb vns sein gnad.  
Amen.

End des Büchhns des heiligen  
Joannis Chrysostomi.





...  
...  
...  
...  
...  
...



7  
Anno 994. War im Jung Wind  
im Turch in Bayern.  
Und War im Kirchtag zu  
Augensprung.





155 474


AB 155 474  
(X 220 4434)

Tr 116 m.


VD 17 355.











**Einhüpfch**  
**schön Büchlin des heil**  
gen Joannis Chrysostomi / Bis  
schoffs zu Cōstantinopel / vor eilff  
hundert Jaren geprediget / vber  
das Apophthegma vund kurzen  
Spruch / ES VVIRT NIE  
MAT GESCHEDIGT DANN  
VON IM SELBS. Verneü  
lich außgangen vñ  
verteütscht.

**Durch M. Matthiam Erbium,**  
Predicant zu Kychenwyr.

Biß gedultig alle zeyt  
In der wält vnd creützes streyt  
So wirst du dir kein schaden thon  
Aber durch Gottes krafft beston.

**Getruckt zu Mülhusen im**  
**oberen Elsas durch Pe-**  
**ter Schmid.**